

# NOTAGANAGAXI ANE IDÍ MARCOS

Marcos judeu codaa onalee lioneeega, nigjijo Jesus maleegigotedeloco digoina iigo. Marcos lixigagawa Barnabé ane nexodi ijaa Paulo nigjijo odoejegi niwajjegegi modigotece eletidi iigotedi moyelogoditedibece nibodicetedi anele. Odaa nigidiaagidi ja yaxawa Paulo nigjijo me idei niwilogonagaxi. Pedro jigijaa yaxawa Marcos me nakato Goniotagodi, codaa Pedro jigijaa yelogodita Marcos ane leeditibige me iditini. (Awiniteloco miditaga Atos 12.12,25; 13.5,13; 15.37; Colossenses 4.10; 2 Timóteo 4.11; 1 Pedro 5.13).

Marcos eetece nagatetigi Jesus me icilatidi eelotaginadi, codaa meote émagaga me newigatace. Eledi yalagata Jesus mida notoetiigitedeloco inoatawece niwicidi abeyacagaga, codaa me godaxakawa Satanás. Eledi yalagata Jesus mida nagatetigitedeloco niwocotaga inaa ebekadi nelecoli. Codaa Marcos yalagata Jesus mida nagatetigi me ixomagateetedice codaa me napitagadi gobeyacegeco. Marcos agica daga yalagata lanokegi Jesus, pida bogodaa yalagata nigidaa dinanatedigi Jesus meote ane iigete Aneotedogoji meote, meotedibige me godewigatace.

## Natematigigi João Batista

*(Mateus 3.1-12; Lucas 3.1-18; João 1.19-28)*

**1** <sup>1</sup>Nibodicetedi anele aneetece Jesus Cristo, Lionigi Aneotedogoji.

<sup>2</sup>Jigidaagee maleekoka dinojogotedini nibodicetedi anele. Isaías ijaagijo eledi anyelogoditedibece lowooko Aneotedogoji nigjijo jotigide, oyalagatalo Aneotedogoji lotaga, nigjijo modi,

“Digawini! Jimonyaticogi gadodoe nigjijo aneetece niginoa yotaga me ilakidetece ganaigi.

<sup>3</sup>Dapaawetibece miditaga nipodigi ane yadilo ane digica nigeladimigipi, mee me dotaga,

‘Alakidenitema naigi Goniotagodi me ixomagatedijo!

Awii naicoli me dixoketema!’”

<sup>4</sup>João Batista nigjijo ane niige Aneotedogoji idiaagi miditaga nipodigi ane yadilo ane digica nigeladimigipi, odaa nilegetiniwace oko. Yatematitibece latematigo, yalagata nigina oko me leeditibige modinilaatece libeyacegeco, odaa ja dinilege me ikee modinilaatece libeyacegeco, odaa ja ixomagateetedice Aneotedogoji libeyacegeco.



(Marcos 1.9-11)

<sup>5</sup>Ijotawece nigijo nigeladimigipitigi nipodigi Judéia, aniaa nigotaga Jerusalém igotibeci midataga João me nilegetiniwace midi akiidi Jordão. Nigijo nogodi lodoe eliodi oko me inoa libeyacegeco codaa moyemaa moika libeyacegeco, odaa ja nilegetiniwace.

<sup>6</sup>João lowoodi, gameelo lamodi anonibila, codaa nigoenagadi ewacogo. Codaa yeligo gonipidi inaa napigo. <sup>7</sup>Inoatawece nokododi yalakatiditiogi nigica noiigi, meetiogi, “Nigidiaagidi enagieledi oko ane dagaxa me gonegegi caticedi ee, otegexaagaga jakadi me idakagitini lodoe me jowilece liwelatedi. <sup>8</sup>Jibake ninyogodi me gadilegenitiwaji me jikee nigikani mawiite niginoa gabeyacegeco, pida бага ibake Liwigo Aneotedogoji me iigi anodaageni me gadewiki.”

### João ilege Jesus

(Mateus 3.13-17; Lucas 3.21-22)

<sup>9</sup>Nigijoa nokododi me dilegenaga João, Jesus noditedice nigotaga Nazaré, nipodigi Galiléia. Odaa jigigo aneitice João me dilegenaga. Odaa João ja ilege Jesus miditaga akiidi Jordão. <sup>10</sup>Nigijo Jesus naga doletibige

me daxoditedita ninyogodi, agica daga leegi, ja nadi ditibigimedi me domoke. Odaa Liwigo Aneotedogoji ja dinikatelogo dinanatigi yotibi. <sup>11</sup>Odaa Aneotedogoji ja dotaga digoida ditibigimedi, meete, “Akaami Ionigi ane dagaxa me jemaa. Eliodi me idinitibeci akaami leegodi.”

**Satanás dineetalo Jesus me domegeo meote ane beyagi**  
(*Mateus 4.1-11; Lucas 4.1-13*)

<sup>12</sup>Odaa agica daga leegi Liwigo Aneotedogoji ja yadeegitedicogi Jesus miditaga nipodigi ane yadilo ane digicata nigeladimigipi. <sup>13</sup>Odaa Jesus jigidiaagitedice cwareenta nokododi. Odaa Godaxakawa jigicaanigigotalo Jesus me dineetalo, domegeotibige degeote loenatagi ane beyagi. Codaa nigidi nipodigi inoa eijedi ane doide, pida aanjotedi odoweditelogo Jesus.

**Jesus jigidaageyatedigi libakedi miditaga nipodigi Galiléia**  
(*Mateus 4.12-22; Lucas 4.14-15; 5.1-11*)

<sup>14</sup>Nigidiaagidi nogoixotiwece João manitaga niwilogonagaxi, Jesus jigigo nipodigi Galiléia yatematitedibece nibodicetedi anele aneetece Aneotedogoji me icota me iige laalegenali oko. <sup>15</sup>Odaa mee, “Nigica noko Aneotedogoji ane nibikota jigicota. Ja nipegi Aneotedogoji nige iige laalegenali oko. Adinilaanitecetiwaji gabeyacegeco, codaa iwagati nibodicetedi anele.”

<sup>16</sup>Nigijo Jesus me noxiwigi liniogotibece niweiigi Galiléia, odaa ja nadi Simão ijaagijo nioxoa ane liboonagadi André. Oyokoletedinigi leelatiidi miditaga weiigi leegodi mina libakedi me nomiigomigipi. <sup>17</sup>Odaa Jesus meetediogi, “Anagi, aniwitibici! Gadiigaxini anodaagemiita oko madeegitalo Aneotedogoji, digo anemii madeegi nogojegi oko.” <sup>18</sup>Agica daga leegi odaa jogoikatedice leelatiidi, odaa jogodiotibece Jesus.

<sup>19</sup>Odaa nigigoawaanigi odoe, Jesus ja nadi Tiago ijaagijo nioxoa ane liboonagadi João, lionigipi Zebedeu. Ideiticoace catinedi liwatece, oyoetibigo leelatiidi. <sup>20</sup>Agica daga leegi Jesus jagaga eniditediogi modiotibece. Odaa jigidiaagoyaladi nigijo eniodi maditaga liwatece ijaagijoa liimetedipi, odaa jogodiotibece Jesus.

**Jesus icilatidi goneleegiwa ane dakatiogi niwigo abeyacegegi**  
(*Lucas 4.31-37*)

<sup>21</sup>Jesus ijaagijo anodiotibece jogotota nigotaga Cafarnaum. Odaa agica daga leegi, naga saabado, Jesus jigigo diigaxinaga manitaga liikanagaxi judeutedi. <sup>22</sup>Nigidi noiigi ane yatecogo eliodi moyopo leegodi anodaageeteda me diigaxinaga. Leegodi nigijo naga diigaxinaga, ibake epaa nagatetigi, aliciagi nigijoa niigaxinaganadi anodiigaxinagatece lajoinaganageco Moisés, leegodi bogoibake nagatetigi niginoa eletidi niigaxinaganadi nigina modiigaxinagatece najoinaganageco.

<sup>23</sup>Manitaga niikanagaxi onini ica goneleegiwa ane dakatiogi niwigo abeyacegegi aneo meote loenataka ane napioi. Odaa nigijo Jesus me diigaxinaga, nigijo niwigo abeyacegegi eo nigijo goneleegiwa me dacaage, odaa mee, <sup>24</sup>“Agica anejinagatagagi, Jesus anicogiticogi nigotaga Nazaré! Domige naganagi me godaagategegi? Jowoogodi anakaami. Akaami Nigijoa ane iolatedice Aneotedogoji, codaa nimonya miniokiniwateda me dibatema.”

<sup>25</sup>Odaa Jesus ja yapetege nigijo niwigo abeyacegegi, meete, “Anotokiti, codaa anotitice nigidoda goneleegiwa!” <sup>26</sup>Odaa nigijo niwigo abeyacegegi eliodi meo me dinaxilaketibece nigijo goneleegiwa. Naga dinigetagee me dacaage, odaa ja ika nigijo goneleegiwa. <sup>27</sup>Ijotawece nigijo noiigi nawelatibigiwaji, odaa ja dinigetiwage, modi, “Amiida ica niciagi? Domige niigenatakanegegi gela? Igaataga ida notoetiigi me iticoitedice niwicidi abeyacagaga, codaa oyiwaagadi!” <sup>28</sup>Odaa agica daga leegi, nibodigitigi nigida aneote Jesus jigilaagiteloco iditawece nipodigi Galiléia.

### **Jesus nicilatiditediniwace eliodi oko**

*(Mateus 8.14-17; Lucas 4.38-41)*


<sup>29</sup>Nigijo Jesus naga noditedice liikanagaxi judeutedi, odaa dowicetedicogi ligeladi Simão ijaa André. Ijo magaga lixigagawepodi Tiago ijaa João. <sup>30</sup>Aca Simão loxiigate nogotota one deelotika. Iwoteloco lipe, eliodi me dapicogo-lolaadi. Naga dakatedio Jesus ijaagijo anodiotibece, odaa jogoyatematitalo me deelotika Simão loxiigate. <sup>31</sup>Odaa Jesus ja dakatediwece aneitice nagajo iwaalo, naga dibatedigi libaagadi, odaa ja yaxawa me nicotini. Odaa ja ma me dapicogo-lolaadi, odaa jigidaageyatigi me yoe liweenigi Jesus ijaagijo anodiotibece.

<sup>32</sup>Nigijo naga gocidi, naga dalimeti aligege, ica noiigi oyadeegitalo Jesus icoatawece nigicoa neelotaginadi codaa me nigica anodakatiogi niwicidi abeyacagaga. <sup>33</sup>Ijotawece nigijo nigeladimigipitigi nigotaga dinatecogotee lodoe Simão ligeladi. <sup>34</sup>Odaa Jesus icilatidi eliodi oko, codaa inoatawece ane latopaco neelotika, codaa iticoitedice owidi niwicidi abeyacagaga. Nigijo naga iticoitedice, odaa Jesus aika nigijoa niwicidi abeyacagaga dogoyalagatalo leegodi oyowoogodi Jesus me Aneotedogoji Lionigi.

### **Jesus dinogatedice mokiniwatece me yotaganege Aneotedogoji**

*(Lucas 4.42-44)*

<sup>35</sup>Nigijo maleedaga dinici okogokoodi, Jesus jigitedibige, odaa jigigo miditaga nipodigi ane digicata oko. Odaa jigidiaagitedice me yotaganege Aneotedogoji. <sup>36</sup>Simão ijaagijo nigijoeledi anodiotibece jogodoletibige Jesus idiaanagadii. <sup>37</sup>Nigijo nogoyakadi Jesus, odaa jogoditalo, “Inatawece noiigi oyapitibigagaji.”



(Marcos 2.1-5)

<sup>38</sup>Pida Jesus meetediogi, “Iniga midiwataga eletidi nigotadawaanaga ane ipegitege nigina anejonaga amaleegaga idiaa yatematikanagadi. Igaataga jigidaa ibakedi Aneotedogoji ane niigetediwa.” <sup>39</sup>Odaa Jesus jigigotedeloco iditawece nipodigi Galiléia, yatematitedibece latematiko midiwataga liiakanagaxiidi judeutedi, codaa iticoitedicoace niwicidi abeyacagaga.

### Jesus icilatidi ica dawace-lolaadi

(Mateus 8.1-4; Lucas 5.12-16)

<sup>40</sup>Ica noko ica goneleegiwa dawace-lolaadi igo midoataga Jesus, odaa yamagatedi lokotidi lodoe, odaa meetalo, “Nigemaani madicilatiti, jowoogodi mida ganimawenegegi madicilatiti.”

<sup>41</sup>Jesus eliodi me iwikode, odaa ipeketedeloco libaagatedi, odaa ja ninigodi, meeteta nigijo goneleegiwa, “Jemaa me gadicilatiti! Natigide, ja gadicili!” <sup>42</sup>Odaa agica daga leegi, ja ma nigijo leelotagi, jegele lolaadi nigijo goneleegiwa. <sup>43-44</sup>Odaa agica daga leegi, Jesus ja iige mopi. Codaa yajoi nigijo goneleegiwa, meeteta, “Digawini! Jinigica anatematiita me gadicilatiti. Pida emii midiwataga sacerdotitedi, odaa ikeeni naga gadicili. Odaa aboonitalo Aneotedogoji nigijo jotigide Moisés ane iige moibootalo mikeenita niginaeledi oko Aneotedogoji naga gadicilatiti.”

<sup>45</sup>Pida nigijo goneleegiwa naga noditice, odaa jigidaageyatigi me yatematitigoi niginaeledi oko, odaa jigilaagitice nibodigi. Joanigidaa leegodi Jesus me daga domagalee yakadi me dakatediwece nigotadi nigina me yemaa. Pida jigidiaagitedice midiwataga nipodaga ane digicata nigeladimigipi, wetice nigotadi. Odaa nigina oko jigigotibeci miniwataga, oicogoticogi inoatawece nigotadi.

**Jesus icilatidi ica goneleegiwa alejaado ane dagadiaa ditinege**

*(Mateus 9.1-8; Lucas 5.17-26)*

**2** <sup>1</sup>Naga ixomagatedijo icoa nokododi, Jesus jogopitacedicogi nigotaga Cafarnaum. Odaa jigilaagitice nibodigi niginiwa ligeladi. <sup>2</sup>Odaa agica daga leegi eliodi oko dinatocogotee, codaa agaleegica nimesi anipegitege lapoagi ligeladi. Odaa Jesus yatematitediogi Aneotedogoji lotaga nigidi noiigi-nelegi. <sup>3</sup>Egidaagee me datematika Jesus, odaa icoa cwaatolo goneleegiwadi oyadeegi ica alejaado ane dagadiaa ditinege, odaa jogoyoyagadi waxoditinigi lipe. <sup>4</sup>Pida agoyakadi dogodipegitalo Jesus leegodi nigijo noiigi-nelegi. Odaa jogodalagatetibigimece diimigi lelága, odaa jogowo lawimagajegi nigijo diimigi lelága, ditibigimedi nigijo aneitedice Jesus. Nigijo nogowo lawimagajegi nelegi, odaa jogonikatini nigijo alejaado. <sup>5</sup>Nigijo Jesus naga nadi nigijoa cwaatolo goneleegiwadi moyiwagadi mida nimawenegegi me icilatidi nigijo goneleegiwa alejaado, odaa jegeete nigijo alejaado, “Ionigi, Aneotedogoji ja napitagadi gabeyacegeco!”

<sup>6</sup>Icoa niigaxinaganadi anodiigaxinagatece lajoinaganegeco Moisés idiaagi nicotiniwace. Odaa ja nowookonaga, codaa epaa dinige, modi, <sup>7</sup>“Igame leegodi idoa goneleegiwa meote ida ligegi? Dotagatedibige Aneotedogoji. Igaataga agica eledi ane yakadi me napitagadi libeyacegeco nigina oko. Iniokiniwateda Aneotedogoji бага yakadi me napitagadi nibeyacegeco.”

<sup>8</sup>Odaa agica daga leegi Jesus ja yowoogodi ane lowoogo, odaa jegeetediogi, “Igame leegodi midaga gadowoogo catiwedi gadaalegenali? <sup>9</sup>Amigida ica ane daga galaga mejita nigidi goneleegiwa alejaado? Domigetaga enegegi dakake mejita, ‘Aneotedogoji ja napitagadi gabeyacegeco’, ogoa, domigetaga enegegi dakake mejita, ‘Adabititini, abaata gadipe, odaagawaligi?’ <sup>10</sup>Pida jikeetagawatiwaji, Ee, Goneleegiwa ane jicogotibigimece ditibigimedi, mida inimawenegegi digoina iigo me inapitagadi libeyacegeco oko.” Odaa Jesus jegeete nigijo goneleegiwa alejaado, <sup>11</sup>“Gadiigeni, adabititini, abaata gagelate, odaa opiliticogi gadigeladi!”

<sup>12</sup>Odaa agica daga leegi nigijo goneleegiwa ja dabiditini, dibata nagajo ligelate, odaa jogopi, yakagiditeloco lodoe nigijo noiigi-nelegi. Odaa ijotawece eliodi moyopo, codaa odogetetalo Aneotedogoji, odaa modi, “Anigica me jinataga liciagi nigida niciagi!”

**Jesus eniditeta Levi me diotibece**

*(Mateus 9.9-13; Lucas 5.27-32)*

<sup>13</sup>Jesus nigigotace liniogotibece weiigi. Odaa ica noiigi-nelegi jigigo midoataga, odaa jigidaageyatedigi me niigaxitediniwace. <sup>14</sup>Maleegidiaa negewaligite, odaa ja nadi Levi, nigijo lionigi Alfeu. Levi idiaagi nicoteloco nibaanco aneitice me dibatibigege ninyeelo ninionigi-eliodi romaanotedi. Odaa Jesus jegeeteta, “Anagi, aniwitibici!” Odaa Levi ja dabiditini, odaa ja diotece Jesus.

<sup>15</sup>Jesus igo Levi ligeladi. Odaa ja nicotedini me ligiiwepodi nigijo anodiotibece. Aagaga ligiiwepodi eliodi nigijo anodibatibigege ninyeelo ninionigi-eliodi romaanotedi, codaa meliodi oko ane dagaxa me abeyacagaga, igaataga eliodi nigijo oko anodiatece Jesus. <sup>16</sup>Nigijoa niigaxinaganadi anodiigaxinagatece lajoinaganageco Moisés, nigijo anida aneetege nigijo lapo fariseutedi, onadi Jesus me ligiiwepodi nigijo anodibatibigege ninyeelo ninionigi-eliodi romaanotedi, codaa me nigijoa eletidi oko aneliodi me abeyacagaga. Nigijo noḡonadi, odaa joḡonigetiniwace nigijo anodiotibece Jesus, moditiogi, “Igame leegodi Ganiotagodi me ligiiwepodi codaa me lacipagawepodi nigina anodibatibigege ninyeelo ninionigi-eliodi romaanotedi, codaa me nigidi oko aninoa libeyaceḡeco?”

<sup>17</sup>Jesus ja wajipate nigijo noḡonigetiniwace nigijo anodiotibece. Nigijo naga wajipatediogi, odaa jeḡeetediogi, “Nigina oko icilegegi ayopotibige dotowegi, inokina nigina oko ane deelotika бага yopotibige dotowegi. Odaa Ee iciagi nigina dotowegi. Igaataga ajanagi nigina iigo daga jiniditiogi nigina oko ane igenagatibigiwaji, pida janagi me jiniditiogi nigina oko abeyacagaga, ane liciagi nigina oko eelotaginadipi, amaleegaga odinilaatece libeyaceḡeco.”

**Oige Jesus oigetece nigica anodaagee me daga jiniodaga menegegi  
jotaganegenaga Aneotedoḡoji  
(Mateus 9.14-17; Lucas 5.33-39)**

<sup>18</sup>Ica noko nigijo anodiotibeci João Batista ijaagijo anodiotibeci fariseutedi odinatita nigigi mepaanogoyotaganeege Aneotedoḡoji. Ica oko enagitibeci midoataga Jesus, odaa jogoige, moditalo, “Nigijo anodiotibeci João Batista ijaagijo nigijo anodiotibeci fariseutedi odinatita nigigi mepaanogoyotaganeege Aneotedoḡoji. Igame leegodi nigidi anodiotibigagadici me dogodinatita nigigi mepaanogoyotaganeege Aneotedoḡoji?”

<sup>19</sup>Odaa Jesus ja ninigoditediogi, meetediogi, “Ina oko nodenigipi midi lalokegi nadonegegi, domigodinatita nigigi ina nigini nigijo ane wado miditaga? Oteḡexaagagoyakadi modinatita nigigi! <sup>20</sup>Pida icota nigica noko nigini ane wado modibata, odaa onogaticogi liwigotigi nigidi oko. Odaa nigica noko nigidi oko nodenigipi jogodinatita nigigi.

<sup>21</sup>Agica ane napade nigina nowoodagagi oxiiḡodi daga dapadenagata nigina lipegetege liwai gela, igaataga nige dinabake, odaa nigijo lapadenaganagadi gela dinixigitiwage, odaa ja yaagadi nigidi nowoodagagi oxiiḡodi anonapade, odaa jeḡepaanaga eliodi laakajegi.

<sup>22</sup>Agica ane iatinigi viinyo gela nagana lagaagaxi ewacogo opake. Igaataga nigina viinyo gela beyagi nigoiatinigi nagana lagaagaxi opake, odaa nigica viinyo mina aniadi, codaa nagada lagaagaxi icota me beyagi. Pida leeditibige moiatinigi viinyo gela nagana lagaagaxi gela.”

**Jesus diigaxinagatetece ica anodaagee modeemitetigi saabado**

*(Mateus 12.1-8; Lucas 6.1-5)*

<sup>23</sup>Ica noko me saabado Jesus ijaagijo anodiotibece oyakagiditeloce ica nixogotagi leyeema. Nogoyakagiditeloce, oadaa nigijoo anodiotibece jogonotegi ligecidi leyeema, onolagilatedi oyeligo. <sup>24</sup>Oadaa nigijoo fariseutedi moditalo Jesus, “Digawini! Igame leegodi nigidi anodiotibigagadici mowo ane yolitogodomi gonajoinaganegegi me daga jaoga nigina me saabado?”

<sup>25-26</sup>Pida Jesus meetediogi, “Ajawienataka me nagalomegenitelocotiwaji nigijoo Davi aneo nigijoo jotigide, Abiatar me lacilo-sacerdotitedi. Nigijoo Davi ijaagijoo lokaagetedipi naga nigodi nigigi, oadaa Davi dakatio minitaga Aneotedogoji ligeladi, oadaa ja yeligo nipaon nigijoo sacerdotitedi anoibootalo Aneotedogoji. Gonajoinaganegegi godoxogo me digica eledi ane yakadi me yeligo nigijoo paon. Inokinoa sacerdotitedi bogoyakadi moyeligo nigijoo paon. Pida Davi baanaga yeligo, codaa yajigotiogi nigijoo lokaagetedipi magaga oyeligo.”

<sup>27</sup>Oadaa Jesus meetediogi, “Aneotedogoji eote nigina saabado me yaxawa nigina oko. Ageote nigina oko midokida modowediteloco niigenatakanegegi ane iige modowediteloco saabado. <sup>28</sup>Ee, Goneleegiwa ane jicogotibigimece ditibigimedi, ida inagatetigi mejitece ane yakadi me jaoga nigina me saabado.”

**Jesus icilatidi ica goneleegiwa beyagi libaagadi me saabado**

*(Mateus 12.9-14; Lucas 6.6-11)*

**3** <sup>1</sup>Jesus dakatacediwece manitaga liiakanagaxi judeutedi. Idiaagitice ica goneleegiwa beyagi libaagadi. <sup>2</sup>Onidi ica oko anoiwitalo Jesus odoletibige monadi mige icilatidi nigijoo goneleegiwa ane beyagi libaagadi me saabado, igataga domogoyemaa me nilaagedi Jesus nigina meote nigicoa ane yolitogodomi lajoinaganegeco Moisés me jaoga nigina me saabado. <sup>3</sup>Oadaa Jesus meeteta nigijoo goneleegiwa, “Anagi digoina lodoe nigina oko!” <sup>4</sup>Oadaa Jesus jegeetediogi nigijoo oko lakapetedipi, “Amiinoa icoa lajoinaganegeco Moisés ane godiige me jaoga nigina me saabado? Domige jakataga me jaoga anele, ogoa domige me jaoga ane beyagi? Domige jakataga me jaxawanaga nigina oko me jaoga lewiga, ogoa jikanaga me yeleo?”

Oadaa agica anoyatigi ligegi dogoigidi. <sup>5</sup>Oadaa Jesus naga iwitediogi, oadaa ja yelatetema nigijoo oko, codaa agecagalo leegodi laalegenali me dagaxa me dakake. Oadaa jegeeteta nigijoo goneleegiwa ane beyagi libaagadi, “Ixokeni gabaagadi!” Nigijoo naga ixoketice libaagadi, oadaa ja ici, ja liciagi nigijoo eledi libaagadi. <sup>6</sup>Oadaa nigijoo fariseutedi ja noditicoaci, jigigotibeci oyotaganege nigijoo lapo anodiotibeci inionigi-eliodi Herodes. Odoletibige nigica nimawenegegi moyeloadi Jesus.

**Ica noiigi-nelegi odiatece Jesus**

<sup>7</sup>Oadaa Jesus naga noditedicogi aneitedice, jigigo lixigagawepodi nigijoo anodiotibece, igotibeci liniogotibece niweiigi Galiléia. Oadaa nigica noiigi-nelegi



anodiotece. Nigica oko oicogoticogi nipodigi Galiléia, codaa me Judéia. <sup>8</sup>Ica eledi oko bogoicogoticogi nigotaga Jerusalém, codaa me nipodigi Iduméia, codaa ica eledi oko oicogoticogi daato akiidi Jordão. Ica eledi oko oicogoticogi nigotadi Tiro aniaa Sidom. Nigidi noiigi-nelegi enagitibeci midoataga Jesus nigijo nogodibodicetibige ane loenataka. <sup>9</sup>Jesus ja iige nigijo anodiotibece moilakideti aca niwatece, meetediogi, “Alakideni nagadi niwatece ayenikamaga degejigo jaxoditinigi.” Leegodi nigijo noiigi-nelegi enegegi oiligice. <sup>10</sup>Codaa eliodi oko ane icilatidi, odaa joanigidaa leegodi nigijo oko eelotaginadi me diniligice, odoletibige moyakadi modibatelogo magaga icilatidi. <sup>11</sup>Nigijo oko anodakatiogi niwicidi abeyacagaga nagonadi Jesus, odaa niwicidi abeyacagaga owo menitiniwace lodoe, codaa nacaagaga, modi, “Jagakamagakaami Lionigi Aneotedogoji!”

<sup>12</sup>Odaa Jesus ja noxogotediniwace, codaa najoitediniwace me dogoyatemati nigica anijoa.

**Jesus iolatedice icoa dooze goneleegiwadi me liigexedi**  
(*Mateus 10.1-4; Lucas 6.12-16*)

<sup>13</sup>Jesus dalagatetedibigimece aca wetiga, odaa jegeniditediogi nigijoa goneleegiwadi ane yemaa me iolatedicoace, odaa jogodiitalo. <sup>14</sup>Odaa Jesus ja iolatedicoace icoa dooze goneleegiwadi aneyatedigi me “Iigexedipi”. Iolatedicoace midiaagi mijoataga, codaa me iige moyatematitedibece latematiko. <sup>15</sup>Odaa ja yajigotediogi notoetiigi moicilatidi eelotaginadi, codaa moiticoiticoace niwicidi abeyacagaga.

<sup>16-17</sup>Digawini liboonagatedi nigijoa goneleegiwadi Jesus ane iolatedicoace: Simão anidokeyatedigi me Pedro, Tiago ijaa João ane lionigipi Zebedeu anidokoyatigi me Boanerges, amina anejinagata, “Lionigipi niximagaga”. <sup>18-19</sup>Codaa aagaga iolatedicoace André, Filipe, Bartolomeu, Mateus, Tomé, Tiago ane lionigi Alfeu, Tadeu, Simão ane domaga yemaa me nidelegetiniwace romaanotedi, ijaa Judas Iscariotes ane yajigo Jesus nigidiaagidi mijoataga nelogododipi.

**Modi Belzebu, ane diaabo, me yajigotalo notoetiigi Jesus**  
(*Mateus 12.22-32; Lucas 11.14-23; 12.10*)

<sup>20</sup>Nigijo Jesus nigigo ligeladi, odaa nigica noiigi-nelegi ja dinatecogoteetace. Odaa Jesus ijaagijo anodiotibece agaleegoyakadi otegeaxagaga me niodaga. <sup>21</sup>Odaa litacepodi Jesus jogodibodice nigica Jesus aneote, odaa ja noditicoaci ligeladi me lowoogo modigotalo Jesus, domogoyadeegitedicogi ligeladi, leegodi ica oko anodi Jesus me yetole.

<sup>22</sup>Onidiwa icoa niigaxinaganadi anodiigaxinagatece lajoinaganegeco Moisés anoicogoticogi nigotaga Jerusalém. Nigidi modi, “Belzebu, ane lacilo niwicidi abeyacagaga, yajacagadi, codaa yajigotalo notoetiigi me iticoitedicoace niwicidi abeyacagaga.”

<sup>23</sup>Odaa Jesus jegeniditediogi nigijo noiigi me igotibeci odipegitalo, odaa ibake natematiko anida ane iciaceketetege me niigaxitediniwace. Odaa meetediogi, “Igamodaagee Satanás me yakadi mepaa diniticoitice minitaga oko? Ayakadi!” <sup>24</sup>Nigidi inionigi-eliodi loiigi ane dawalacetiwage, odaa nigidiaa dinideletiwage, odaa loiigi icota me ma. <sup>25</sup>Nigidi dinoiigiwepodi, ane dawalacetiwage, codaa midiaa dakapetiwage, nigidi noiigi icota me ma. <sup>26</sup>Codaa niwicidi abeyacagaga ane iige Satanás nige dawalacetiwage, odaa idiaa dakapetiwage, icota me ma notoetiigi Satanás, odaa agalee diigenataka.

<sup>27</sup>Pida agica ane yakadi me dakatiwece ligeladi nigini goneleegiwa loniciwengenigi me doliceta niginoa ane nepilidi. Idoka yakadi modolicetalo ane nepilidi nigini goneleegiwa nigodoejegi moigoetini. Odaa nigaleekoka oyakadi moyadeegi niginoa ane nepilidi nigini goneleegiwa. <sup>28</sup>Ejitagawatiwaji nigina anewi. Aneotedogoji yakadi me ixomagateetedice inoatawece ane latopaco libeyacegeco nigina oko anowote, codaa lotaga ane beyagi modakapetege. <sup>29</sup>Pida Aneotedogoji baadaga ixomagateetedice nigina oko ane beyagi modotagatibige Liwigo Aneotedogoji. Idioka limedi me laagedi nigini oko.” <sup>30</sup>Odaa jigidaagee Jesus me igidi leegodi nigidi oko modi me dakatiogilo niwigo abeyacegegi.

### **Jogototalo Jesus nioxoadipi ajaagajo eliodo**

*(Mateus 12.46-50; Lucas 8.19-21)*

<sup>31</sup>Nigicotiibeci Jesus nioxoadipi ajaagajo eliodo. Odaa ideiticoace we nigijo diimigi, odaa jogodienagatalo Jesus. <sup>32</sup>Eliodi oko oyawiile Jesus, odaa moditalo, “Gadiodo idiaa ganioxoadipi etidi wetice, onienagatagawa.”

<sup>33</sup>Odaa Jesus ja igiditediogi, meetediogi, “Amaajo aca eiode? Codaa amijjo ica inioxoadipi?” <sup>34</sup>Naga niipetediogi Jesus nigijo ane nicotiniwace anoyawiile, odaa jegee, “Digawini! Nigidi jigidiaa inioxoadipi codaa me eiode. <sup>35</sup>Igaataga nigina aneo Aneotedogoji ane yemaa, nigini jiginiaa inioxoa, iniwaalo, codaa me eiode.”

### **Natematigigi ica enanaganaga**

*(Mateus 13.1-9; Lucas 8.4-8)*

**4** <sup>1</sup>Jesus naga niigaxitacediniwace noiigi liniogotibece niweiigi Galiléia. Odaa eliodi oko odilapodetelogo. Joanigidaa leegodi me waxoditedinigi nagajo niwatece nicotedinigi le, odaa nigijo noiigi-nelegi idiaagi miditaga dotiwadi liniogotibece weiigi. <sup>2</sup>Nigijo Jesus me niigaxitediniwace nigijo noiigi, yatemati owidi natematiko anida ane iciaceketetege.

Odaa meetediogi, <sup>3</sup>“Diganajipaatiwa! Ica goneleegiwa one yadeegi nolacidi meyateloco miditaga lixogotagi. <sup>4</sup>Nigijo naga ilaagagaditedibece nigijjoa nolacidi inoatawece liwailidi, odaa onicoa icoa lolacidi aneniteloco naigi liniogotibece. Odaa ilaagaxodi jegenagitibeci, jogoyelio nigijjoa lolacidi. <sup>5</sup>Icoa eletidi lolacidi onenite midiwataga wetiadi ane degewi ina mica iigo. Odaa agica daga leegi nigijjoa lolacidi ja nokologo leegodi me degewi ina mica iigo. <sup>6</sup>Pida naga

dapicogo aligege, odaa ja yalegi ijoatawece nigijoa nawodigijedi, odaa ja yadilo, leegodi onatecigijoa litotitedi. <sup>7</sup>Icoa eletidi lolacidi enitedini miditaga ipelakijadi. Odaa ipelaga naga ili, odaa ja igowalagadi lawodigijedi nigijoa goneleegiwa aneyatedini, odaa aika daga etaye. <sup>8</sup>Pida icoa eletidi begeniteloco miditaga ica iigo anele. Naga nokologo, odaa begele me ili, codaa etaye. Onidateci ligegi yajigo triinta, seseenta, codaa me onaniteci taalialolacidi leyeema.” <sup>9</sup>Odaa meetediogi Jesus, “Nigina oko ane wajipatalo yotaga, leeditibige me watacotece.”

**Jesus yatemati ane diitigi nigijoa natematigigi nigijoa enanaganaga**

*(Mateus 13.10-23; Lucas 8.9-15)*

<sup>10</sup>Nigijoa nogopitibeci nigijoa noiigi-nelegi, odaa onaniginiwatece Jesus ijaagijoa dooze anodiotibece ijaagijoa eletidi lokaagetedipi anidiaagitice oigetece anodaa diitigi nigijoa latematigo ane yatemati. <sup>11</sup>Odaa Jesus jegeetediogi, “Aneotedogoji gadiolaatedicetiawaji me ikeetedagawatiawaji anodaagee me iige laalegenali nigina oko. Pida jatematitigi natematiko anida ane jiciaceeketege nigina ane dogoyemaa Aneotedogoji me iige laalegenali.

<sup>12</sup> ‘Jigidaa leegodi midegejigotiogi amaleegaga onadi,  
pida agoyowoogodi nigica ane jao,  
codaa owajipata,  
pida agoyowoogodi iigaxinaganegeco.

Odaa jigidaa me dogoyakadi modinilaatece libeyacegeco,  
odaa ayakadi Aneotedogoji me yapitagadi laalegenali.”

<sup>13</sup>Odaa Jesus ja nigetediniwace, meetediogi, “Nige dogowoogoti ane diitigitiawaji nigijoa yatematigo ane jatemati, igame ganimawenegegi mowoogoti inoa eletidi yatematiko? <sup>14</sup>Nigijoa goneleegiwa ane ilaagagaditedibece lolacidi liciagi nigina ane yatematitedibece nibodicetedi anele ane icogotedicogi miniwataga Aneotedogoji. <sup>15</sup>Initibece oko ane wajipatalo niginoan nibodicetedi anele liciagi naigi liniogotibece. Nigina naga wajipata, odaa agica daga leegi Satanás ja noga natematiko ane ideite catiwedi laalegenali. <sup>16</sup>Odaa ina eledi oko liciagi nigina iigo aninoan wetiadi. Nigina nogowajipatalo nibodicetedi anele, odibatege nigijoa natematiko, codaa me ninitibigiawaji. <sup>17</sup>Pida nigijoa oko ageliodi eliwagatakanegegi liciaco nigijoa nawodigijedi anokatecigidiwa litodi, odaa agica daga leegi midiaagi. Nigina niginoan ane dakaketema, codaa ina moyalomege nigina eledi oko leegodi monakato Aneotedogoji, odaa nigidi oko jogoika monakato Aneotedogoji. <sup>18</sup>Ina eledi oko liciagi nigina iigo aninaan ipelaga. Owajipatalo nibodicetedi anele. <sup>19</sup>Pida oigecagalege niginoan aninoatigi digoina iigo, odaa dagaxa moyemaa dinyeelo, codaa oyemaa niginoan anicinoan mepoka oyakadi. Odaa jigidaagee, liciagi niginoan nawodigijedi ane yapogoditini ipelaga, odaa inoatawece niginoan anoyemaa mowote aika me ili Aneotedogoji lotaga catiwedi laalegenali, odaa Aneotedogoji lotaga aiigi ane lakataga. <sup>20</sup>Pida ina eledi oko baga liciagi nigijoa iigo anele. Nigidi oko odibatege nibodicetedi anele, odaa

Aneotedogoji lotaga iigi lakataga nigidi oko, odaa liciagi metaye nigijoa lolacidi anoyajigo ligegi anidiwa triinta, seseenta codaa me onaniteci taalia lolacidi.”

**Jesus diigaxinagatetece nilokokena Aneotedogoji**  
(*Lucas 8.16-18*)

<sup>21</sup>Jesus egidaagee me dotaga, meetediogi, “Domigica ane yalegi noledagaxi odaa yapogoditeloco baalida, ogoa domigetaga ixotiwece nipe le? Agica! Pida oyalegi nagana noledagaxi, odaa onanyoketi ditibigimedi. <sup>22</sup>Odaa agica ane dinagaditi ane daga yelogoteloco. Codaa inoatawece ane dinagaditedini, icota monadi nigina oko. <sup>23</sup>Nigina oko anowajipatalo yotaga leeditibige mowatacotece.”

<sup>24</sup>Meetediogi Jesus, “Nigina бага owookoni nigina majipaatalo yotaga. Anemiita nigina eledi oko, odaa jigidağaga igotedagawatiwaji Aneotedogoji, odaa eliodi nigica ane yajigote nigina oko anowatacotece latematiko. <sup>25</sup>Igaataga Aneotedogoji dağaxatace meliodi ane yajigote nigina oko anoyiwagadi. Pida nigina oko ane digica eliwagatakanegegi, Aneotedogoji noga nigijo onatecigini anida minitaga.”

**Natematigigi icoa lolacidi**

<sup>26</sup>Jesus mee, “Nigina Aneotedogoji me iige laalegenali oko, liciagi nigina goneleegiwa aneyatedini nolacidi miditaga iigo ane ibinie. <sup>27</sup>Nigina negenoale diote, odaa nicotini nigina naga noko, odaa nigijoa nolacidi ja nokologo codaa me ili, pida ayowoogodi nigica anodaagee me ili. <sup>28</sup>Iigo eo me ili nawodigijedi. Odoejegi nokologo nawodigijegi, nigidiaagidi ja daxoditice ligecidi. Odaa nigidiaagidi jagaga nodi lolacidi. <sup>29</sup>Nigina negei niginoa ligecidi, odaa agica daga leegi nigijo goneleegiwa ja nakagidi yatita nodaaajo, leegodi jigicota noko me nopilagaditedio lawodigijedi.”

**Natematigigi aca lolacawaana “mostaada”**  
(*Mateus 13.31-32, 35; Lucas 13.18-19*)

<sup>30</sup>Egidaagee Jesus me dotaga, mee, “Igamigodaagee nige iige Aneotedogoji laalegenali nigina oko? Amigida ica natematigo ane jiciaceeketege me jakadi me jatemati? <sup>31</sup>Nigina Aneotedogoji nigidaageyatedigi me iige laalegenali nigina oko, liciagi nagana lolagi mostaada. Nigina moyateloco nigina iigo, nagani lolagi dagaxa me lionawaana liwigotigi niginoa eletidi lolacidi. <sup>32</sup>Pida nigidiaagidi nigoyatini nagajo lolagi, odaa ili yayoketicoace nigijoa eletidi nawodigijedi. Codaa libiwedi dagaxa me nelecoli, odaa ilaagaxodi owote libatoli odiwaletigi laamotiidi.”

<sup>33</sup>Nigijo Jesus me yatematitediogi nigijo oko nibodicetedi anele, ibake owidi natematiko anida ane iciaceeketetege liciagi nigijoa natematiko baanaga yatematitediogi. Inoka eetetece nigina anoyakadi moyowoogodi nigina oko. <sup>34</sup>Codaa adatematikatediogi me daga ibaketeda natematigo anida ane iciaceeketege. Pida nigina nogokiniwatece ijaagijo anodiotibece, odaa Jesus ja yelogoditediogi nigica ane diitigi ijoatawece nigijoa ane diigaxinagatetece.

### Jesus yamaketedini niwocotaga

(Mateus 8.23-27; Lucas 8.22-25)

<sup>35</sup>Nigijo noko naga dawike, Jesus meetediogi nigijo anodiotibece, “Iniga daato weiigi.” <sup>36</sup>Odaa jigidiaagoyaladi nigijo noiigi-nelegi, odaa jogoyadeegi Jesus catinedi niwatece nigijo aneetedi naga ika me datematika, odaa jigigotibeci. Odaa ijoa eletidi niwateceli jogodiotece.

<sup>37</sup>Pida codaagida nogonenagi ica niwocotaga. Odaa nigicoa ebekadi nelecoli ja yalaketedibigeloco nagajo niwatece, odaa nagajo niwatece ja domaga nolee ninyogodi. <sup>38</sup>Pida idiaa Jesus oneote lakaalagadi, odaa ja diote digoida lowiditice nagajo niwatece. Odaa nigijo anodiotibece jogoyojietelogo, odaa moditalo, “Goniigaxinogodi, agica mawiitiogoji? Nigida moko ja jaaga!”

<sup>39</sup>Odaa Jesus jigitedibige, odaa ja yamaketedini niocodi, codaa meetediogi ebekadi, “Anotokitiniwaci!” Odaa niocodi ja damatini, odaa ijoatawece damatiniwace. <sup>40</sup>Odaa Jesus meetediogi, “Igaamee ina madoiitiwaji? Igame leegodi me degewi me iwagati Aneotedogoji?”

<sup>41</sup>Odaa eliodi modoitalo Jesus nigijo anodiotibece leegodi nigijo loenatagi. Odaa dinigetiwage, modi, “Amiidoa icoa goneleegiwa? Igaataga codaa me niocodi inaa ebekadi oyiwagadi!”

### Jesus icilatidi ica goneleegiwa ane dakatiogi niwigo abeyacegegi

(Mateus 8.28-34; Lucas 8.26-39)

**5** <sup>1</sup>Jesus ijaagijo nigijo anodiotibece naga digetita daato niweiigi Galiléia, odaa jogotota miditaga nipodigi ane ligeladi noiigi geraseenotedi. <sup>2</sup>Nigijo Jesus naga waxoditedice nagajo niwatece, agica daga leegi ja noditice ica goneleegiwa icogotiwece apiigo, odaa jigicotalo Jesus. Nigijo goneleegiwa dakatiogi niwigo abeyacegegi. <sup>3</sup>Ja ligeladi minitaga apiigo midiwataga lawimagajetedi-wetiadi anoyatedice niginoa émagaga. Aonagaleegica ane yakadi me niwilo nigijo goneleegiwa, otegexaagaga nigina moibake galeena moigoetini. <sup>4</sup>Onelioditibece nigina modibata, odaa jogoigoe libaagatedi, codaa me logonaka oyatita galeena, pida idioka limedi me nakagidi nigicoa galeenatedi, eote lagaagetedawaanaga. Codaa agaleegica ane yakadi me yajacagadi, leegodi ja dagaxa me yoniciwadi. <sup>5</sup>Inoatawece nokododi codaa minoatawece enoaleli igoteloco apiigo codaa midiwaga wetiadi, dapaawetibece, codaa dinanacilotidita wetiga.

<sup>6</sup>Nigijo goneleegiwa naga naditege Jesus, walokoditege, odaa jegenitiniigiigo lodoe Jesus. <sup>7</sup>Odaa dapaawe, meetalo, “Agica anejitagagi, Jesus. Jagakamagakaami Lionigi Aneotedogoji, Aneotedogoji aninoatawece notoetico. Jibake Liboonagadi Aneotedogoji me jipokotagawa me daga adiloikatiti.” <sup>8</sup>Odaa nigijo niwigo abeyacegegi eote nigijoa lotaga leegodi maleedaga dotaga, Jesus jagaga dotaga, meeteta, “Niwigo abeyacegegi, anotitice nigini goneleegiwa!” <sup>9</sup>Odaa Jesus ja ige nigijo niwigo abeyacegegi, meeteta, “Igame gaboonaagadi?” Odaa ja igidi, mee, “Iboonaagadi ‘Eliodi

oko! Leegodi moko eliodi.”<sup>10</sup> Odaa nigijo niwigo abeyacegegi eliodi me dipokotalo Jesus me daga iticoitedicoace me iige moyaladi nigidi nipodigi.

<sup>11</sup>Digoida maditaga nagaca wetiga onini ica lapo nigidagiwadi, niodaga.

<sup>12</sup>Odaa ijoatawece nigijoa niwicidi abeyacagaga eliodi modipokotibigalo Jesus, moditalo, “Godikanegegi me iniga jakagatiogilo nigidagiwadi.”<sup>13</sup> Odaa Jesus ja ikatedicoace me igotibeci, odaa nigijoa niwicidi abeyacagaga ja noditicoaci mijotaga nigijo goneleegiwa, odaa jogodakatiogilo nigidagiwadi. Odaa ijotawece nigijo lapo nigidagiwadi walediticogi midataga wakagi iigo, odaa daxaboketiniwace, jogocegaga miditaga weiigi. Onijoa iniwata miili nigidagiwadi.

<sup>14</sup>Odaa nigijoa goneleegiwadi anoyowie nigidagiwadi ja ialeticoace. Odaa jogoyatematitedibece manitaga nigotaga, codaa me niginoa nipodaga anototalo. Odaa eliodi oko igotibeci oiwi nigica niciagi.<sup>15</sup> Nigijo nogototalo Jesus, odaa jogonadi nigijo goneleegiwa anodakatiogi niwicidi abeyacagaga. Odaa eliodi me doitibigiwaji nigijo nogonadi nigijo goneleegiwa me nicoti, codaa me dinixo, codaa agalee yetole.<sup>16</sup> Nigijo anonadi nigijo niciagi oyatematitedibece anodaageeteda nigijoa nigidagiwadi, codaa nigijo goneleegiwa ane dakatiogi niwicidi abeyacagaga.<sup>17</sup> Odaa jogodipokotalo Jesus me noditedice nigidi niigo.

<sup>18</sup>Nigijo Jesus naga waxoditedinigi nagajo niwatece mopi, nigijo goneleegiwa anijo modakatiogi niwicidi abeyacagaga dipokotibigalo Jesus me domaga yemaa me lixigagawa.<sup>19</sup> Pida Jesus ayemaa daga yadeegi, odaa meeteta, “Emii, opilitacoci gadiigeladi, odaa atematiitioigi gadoiigiwepodi nigica Ganiotagodi Aneotedojoji meote eliodi aneletagadomi, codaa eliodi me gadiwikodeni.”<sup>20</sup> Odaa nigijo goneleegiwa jogopi, igo miditaga nipodigi ane liboonagadi “Deez nigotadi”, odaa yatematitibece ijoatawece nigicoa Jesus aneotetema. Odaa ijotawece nigijo oko eliodi moyopo.

### **Jairo dipokotalo Jesus me icilatidi liona**

*(Mateus 9.18-19; Lucas 8.40-42)*

<sup>21</sup>Jesus naga digetacedita daato weiigi. Odaa ica noiigi-nelegi dinatecogoteetelogo liniogotibece weiigi.<sup>22</sup> Onida ica goneleegiwa ane liboonagadi Jairo one eledi lacilo liakanagaxi judeutedi manitaga nagani nigotaga. Jairo lixigagawepodi nigijo noiigi-nelegi. Nigijo naga nadi Jesus, odaa dakagitini lodoe.<sup>23</sup> Odaa eliodi me dipokotalo Jesus, meetalo, “Jagadiaa ionawaana ja doletibige me yeleo. Anagi, ipekeniteloce gabaagatedi amaleegaga ici me deelotika, codaa amaleegaga iwoko némaga!”<sup>24</sup> Odaa Jesus jigigo lixigagawa Jairo.

### **Jesus icilatidi aca iwaalo awodina**

*(Mateus 9.20-22; Lucas 8.43-48)*

Eliodi oko lixigagawepodi Jesus codaa diniligice.<sup>25</sup> Onajo liwigotigi nigijo oko aca iwaalo awodina. Jonegeote dooze nicaagape me leelotagi.<sup>26</sup> Eliodi migotece dotowexedi, yaagadi icoatawece ninyeelo. Codaa eliodi me dawikode me diniwakateetibece, pida agica ane dinilatece, pida jegepaanaga deelotika.

<sup>27</sup>Nigijjo naga dibodice moyalagatalo Jesus, odaa dakatiogi liwigotigi nigijjo noiigi-nelegi, odaa nowidila Jesus, odaa dibatece nijayogo Jesus. <sup>28</sup>Leegodi meetibige le, “Nige jakadi mokexaa jiba-aatece nijayogo, odaa ja idici.”

<sup>29</sup>Odaa ewi nigijjo naga dibatece nijayogo Jesus, agica daga leegi nigijjoa lawodi ja wakagitege, odaa ja deemitecece lolaadi naga ici.

<sup>30</sup>Nagajo lakata Jesus yowoogodi me noditice midoataga loniciwaga Aneotedogoji ane icilatidi nagajo iwaalo, odaa naga nawiilitetege nigijjo lapo-nelegi, odaa ja digika, meetediogi, “Amiijo ica ane dibatece inijayogo?”

<sup>31</sup>Odaa nigijjo anodiotibece moditalo, “Igame leegodi ina magikani mica ane dibatagaloco, aganati minatawece nigina oko etigadiligiceni?”

<sup>32</sup>Pida Jesus niipete liwailidi me doletedibige me nadi nigica ane dibatece nijayogo. <sup>33</sup>Odaa nagajo iwaalo jegenagi lodoe, odaa yamagatedini lokotidi, igaataga yowoogodi mijo ane deemitecece lolaadi. Odaa dawigice, doi, odaa ja yatematitalo Jesus ijoatawece nigijjoa baanaga ixomagateetedice. <sup>34</sup>Odaa Jesus meeteta, “Iona, ja gadicili leegodi manakatonni Aneotedogoji. Emii, odaa jinagalee adinigecegalegeni. Igaataga ewi naga gadicili.”

### **Jesus yewikatiditace Jairo liona**

*(Mateus 9.23-26; Lucas 8.49-56)*

<sup>35</sup>Jesus egidaageeteda me dotaga negenotibeci ica oko oicogoticogi ligeladi Jairo, nigijjo lacilo niikanagaxi. Odaa jogowo leemidi Jairo, modita, “Gadiona ja yeleo. Agalee leeditibige daga anigiwocitedice niigaxinaganaga.” <sup>36</sup>Odaa nigijjo Jesus naga wajipate lotaga nigijjo oko, odaa meeteta Jairo, “Jinagadoii, pida anakatonni nimawenegegi Aneotedogoji.” <sup>37</sup>Odaa Jesus agica ane ikatedio me lixigagawa, pida ijoka yadeegiteda Pedro, ijaagijjo itoataale dinioxomigipi Tiago ijaa João me lixigagawepodi. <sup>38</sup>Nigijjo nigicotiobeci Jairo ligeladi, odaa Jesus ja nadi nigijjo ninyaaga, igedi me nacaagagateloco. <sup>39</sup>Nigijjo naga dakatediwece diimigi, odaa meetediogi, “Igaameni macaagetibecetiwaji, codaa mawiite inoa gadayaagegeco? Nagadi nigaanawaana ayeleo, pida diote.”

<sup>40</sup>Odaa nigijjo noiigi jogoyame. Odaa Jesus ja iige mijotawece noditicoaci. Odaa ja leyakawepodi eliiododipi nagadi nigaanawaana, ijaagijjo itoatadigida anodiotibece, odaa dakatediwece catiwedi aneitice lolaadi nagadi nigaanawaana, anidiwa dooze nicaagape. <sup>41</sup>Odaa Jesus naga dibatedigi libaagadi, meeteta, “Talítá cumi!” amina anejinagata “Nigaanawaana, adabitiini!”

<sup>42</sup>Odaa agica daga leegi nagajo nigaanawaana ja dabiditini, odaa jegewaligi. Pida eliodi me nawelatibigiwaji, codaa moyopo nigijjo anonadi. <sup>43</sup>Odaa Jesus ja najoitacediniwace me dogoyatemati nigida niciagi. Odaa ja diigenatakate mowo liweenigi nagajo nigaanawaana.

**Nigeladimigipitigi nigotaga Nazaré agonakato Jesus**

*(Mateus 13.53-58; Lucas 4.16-30)*

**6** <sup>1</sup>Jesus naga noditedice nigijo aneite, odaa jogopitedicogi manitaga epaa nigotaga lixigagawepodi nigijo anodiotibece. <sup>2</sup>Odaa nigica naga saabado, jigigo mani liakanagaxi judeutedi, odaa ja dowicenaga me diigaxinaga. Odaa eliodi nigijo oko ane yatecogo oyopo nigijo nogowajipatalo lotaga Jesus, odaa dinigetiwage, modi, “Igamige niigaxinagadi me diniigaxitetece niginoa liigaxinaganegeco? Amigijo ica ane yajigotalo lixakedi? Igamigodaagee me yakadi meote niginoa godoxicegetedi? <sup>3</sup>Nigidoa me jowoogotaga geme gapinteelegi, codaa lionigi Maria, nioxoa Tiago, José, Judas ijaa Simão. Idiaa niwaalepodi inaa ligeladi digoina.” Odaa agele modibatege Jesus.

<sup>4</sup>Pida Jesus meetediogi, “Nigina oko idioka limedi modeemitetibige nigina anoyelogoditedibece lowooko Aneotedogoji. Pida inoka dogodeemitetibige nigina nigeladimigipitigi manitaga epaa nigotaga, idiaa litacepodi, codaa me loiigiwepodi.”

<sup>5</sup>Odaa Jesus ayakadi meote niginoa godoxicegetedi nelecoli manitaga nagani epaa nigotaga. Idokida me ipeketedeloco libaagatedi onateciigidiwa eelotaginadi me nicilatiditedini. <sup>6</sup>Codaa Jesus eliodi me yopo leegodi me dogonakatoteda.

**Jesus iige nigijo anodiotibece moyatematitibece nibodicetedi anele**

*(Mateus 10.5-15; Lucas 9.1-6)*

Odaa Jesus jigigotetece nigotadawaanaga nigidi nipodigi, codaa niigaxitediniwace oko.

<sup>7</sup>Odaa eniditediogi nigijo dooze anodiotibece, odaa ja iige migotibeci itoataaletibece oyatematitedibece nibodicetedi anele. Maleedigigotibeci, odaa ja yajigotediogi notoetiigi moyakadi moiticoitedice niwicidi abeyacagaga.

<sup>8</sup>Codaa meetediogi me digicata anonibatine me wiajeega. Ijoka yajoitetece moyadeegi ligiilagadi. Pida aika dogowo oyadeegi liawogo, otegeaagaga nixacoola, otegeaagaga dinyeelo catinedi ninyeelaagaxi anonigoetigi. <sup>9</sup>Odaa iigetediogi modinixotinigi liwelatedi, codaa moyadeegi onadateci nitoonicogo. <sup>10</sup>Odaa nigidiaagidi Jesus jegeetediogi, “Nigakaatiwecetiawaji anigini diimigi me idiaagonitice, odaa idiaagonitice minitaga nigepaa limedi manotitice nagani nigotaga. <sup>11</sup>Nige degele modibatagagitiawaji anigidi nigeladimigipi, codaa nige dogoyemaa mowajipatalo gadatematiko, odaagopili. Niganotiticogitiawaji we, odaa iticigi amogo midoa gawelatedi me ikeenitioigi mepaa icogotioigi. Ejitagawa nigica noko nigicota nige iloikatidi Aneotedogoji nigina oko leegodi libeyacegeco, iloikatidi nigidi oko caticedi nigijo nigeladimigipitigi nigotaga Sodoma ajaa Gomorra leegodi nigijo oko dagaxa minoa libeyacegeco.”

<sup>12</sup>Odaa nigijo anodiotibece jigigotibeci, oyatematitioigi inatawece oko me leeditibige modinilaatece libeyacegeco. <sup>13</sup>Codaa moiticoitedice owidi



niwicidi abeyacagağa. Codaa moyatikoleteloco lajidi oliveira lacilo eliodi oko eelotaginadi, odaa jogonicilatititiniwace.

**Lemegegi João Batista**  
(*Mateus 14.1-12; Lucas 9.7-9*)

<sup>14</sup>Herodes nigijo inionigi-eliodi dibodicetalo icoatawece nigicoa Jesus loenataka, leegodi nigeladimigipitigi owidi nigotadi oyalagatalo. Onica ica oko anodi, “Nigidoa João Batista Aneotedogoji ja yewikatitidace. Joanigidaa leegodi mida notoetiigi meote niginoa godoxicegetedi.” <sup>15</sup>Pida icaeledi oko modi, “Nigidoa Elias.” Odaa icaeledi modi, “Nigidoa anigepidigica nigijo anoyelagoditedibece Aneotedogoji lowooko, nigijo baanağa nigo nigijo jotigide!”

<sup>16</sup>Pida nigijo Herodes naga wajipatibece moyalagatalo nigica oko, moditece Jesus, odaa mee, “Ee mejimewi nigidaagida João Batista, nigijo ane jiigenatakata moyakagiditice lotoinağadi. Ja yewigatace!”

<sup>17</sup>Igaataga Herodes jigijaa diigenatakata moigoetini João, odaa jogoixotiwece niwilogonagaxi. Eo nigida anigota João leegote Herodias, nagajo lodawa Filipe, nigijo nioxoa iniaagini Herodes. Herodes dibanoonagatece Herodias. <sup>18</sup>Joanigidaa leegodi João midioka limedi meetibiga Herodes, “Liigenatakanegeco Aneotedogoji yolitagadomi me gadodawa ganioxoa lodawa.”

<sup>19</sup>Odaa Herodias eliodi me yelatema João, domaga yemaa daga yeloadi. Pida agica nimawenegegi. <sup>20</sup>Igaataga Herodes doita João, leegodi yowoogodi João me goneleegiwa ane igenaga ane dibatema iniokiniwateda Aneotedogoji. Odaa Herodes aika digica João ninyaagi. Herodes lemaanigi me wajipata João, pida nigijo naga wajipatalo lotaga, eliodi me dogowikomata, agalee yowoogodi nigica anee.

<sup>21</sup>Pida jigicota ica noko Herodias me yakadi nimawenegegi meo ane beyagitema João. Nigica noko me nakatio lanikegi Herodes. Odaa Herodes jegeo nalokegi, ja nodetiogi nigijo ane niigenatakanaga ijaagijoa nigijoa lacilodi iodagawadi codaa me nigeladimigipitigi ane gonegaga nipodigi Galiléia.

<sup>22</sup>Odaa aca liona Herodias ja dakatiwece aneiticoace me naloogo, odaa ja dinibaile. Herodes ijaagijjo lodenigipi eliodi moyemaa nibailegeco. Odaa inionigi-eliodi Herodes meeta nagajo awicije, “Anipokitiwa nigica anemaani, odaa jajigotagawa.” <sup>23</sup>Odaa jegeo ligegitege, meeta, “Okanicodaagica ananipokitiwa, jajigotagawa, codaa me liwai inatawece nigina ane jiige.”

<sup>24</sup>Odaa nagajo awicije ja noditice, odaa jigigo ige nagajo eliodo, meeta, “Amiini ica ane jipokotigi?” Odaa ninigodi, meeta, “Ipokita lacilo João Batista.”

<sup>25</sup>Odaa agica daga leegi nagajo awicije ja yediiga me dakatacio minitaga inionigi-eliodi, odaa meeta, “Jemaa lacilo João Batista exakitinigi ginogo nigina natigide.”

<sup>26</sup>Odaa nigijo inionigi-eliodi eliodi magecagalo. Pida ayemaa me anojicetema nagajo awicije leegodi jegeo ligegitege, codaa leegodi nigijo nodenigipi moiwita. <sup>27</sup>Odaa agica daga leegi ja iige onijoteci nigijoa

iodagawadi migo manitaga niwilogonagaxi me yakagiditice lotoinagadi João. Odaa nigijo iodagawa jigigo, odaa ja yakagiditice João lotoinagadi manitaga niwilogonagaxi. <sup>28</sup>Odaa ja nadeegi João lacilo yexagatinigi ginogo, odaa ja yajigota nagajo awicije. Odaa nagajo awicije jigigo yajigota nagajo eliodo. <sup>29</sup>Nigijo nogodibodiceta nigijo anodiotibeci João nigida niciaigi, jigigotibeci aneitice, odaa jogoyadeegi lolaadi João, monaligitini.

**Jesus niodegetedini ica noiigi-nelegi**

*(Mateus 14.13-21; Lucas 9.10-17; João 6.1-14)*

<sup>30</sup>Nigijoa dooze goneleegiwadi ane iige Jesus moyatemati latematigo naga dopitibeci, odaa jogoyatematitalo Jesus ijoatawece loenataka codaa ane odiigaxinagatece. <sup>31</sup>Odaa Jesus meetediogi, “Anagi! Iniga mokomokoko miditaga nipodigi ane daxixe ane digica nigeladimigipi me inipenakawaanigi.” Leegodi eliodi oko igotibeci miditaga, inaageledi baanaga dopitibeci, odaa Jesus ijaagijo anodiotibece agaleegica nimesi me niodaga. <sup>32</sup>Odaa jogowaxoditini aca niwatece, odaa ijokijo migotibeci miditaga nipodigi ane daxixe, ane digica oko.

<sup>33</sup>Pida eliodi oko onadi nigijo naga noditicoaci, codaa oyowoogodi nigijaagijo. Odaa nigijo oko waleditece liniogotibece weiigi. Nigica oko oicogoticogi inoatawece ane nigotadawaanaga, odaa odojedipi mototicogi ane diitedicogi Jesus ijaagijo nigijo anodiotibece. <sup>34</sup>Nigijo Jesus naga waxoditedice nagajo niwatece, odaa ja nadi nigijo noiigi-nelegi. Odaa eliodi me iwikodetediogi, leegodi iciaceeketetege niginoa waxacocoli ane digica nowienogodi. Odaa jigidaageyatedigi me niigaxitediniwace nigijo oko, codaa owidi nigicoa ane iigaxitetece.

<sup>35</sup>Nigijo naga doletibige me dawike, nigijo anodiotibece Jesus jigigotibeci midoataga, odaa moditalo, “Nigina nipodigi anejonaga agica nigeladimigipi codaa ja gocidi. <sup>36</sup>Iigeni nigina noiigi mopitibeci, amaleegaga igotibeci niginoa bajeendatedi inaaginoa nigotadawaanaga modinoojetetibige liweenigi.”

<sup>37</sup>Pida Jesus ja igidi, meetediogi, “Akamagakaamitiwaji ajicitiogi anoyeligo nigina noiigi!” Odaa nigijo anodiotibece moditalo, “Okomogoko jinoojeteegatibige paon anoyeligo? Igaataga loojedi dibata iniwata-taalia beexotedi, ane loojedi oito epenaitedi me jibaaga!”

<sup>38</sup>Odaa Jesus meetediogi, “Digemii awini! Igame liwokodi ganipaantedi?” Odaa jigigotibeci oiwi, odaa moditalo, “Idiwa onexaa ciinco paantedi idiaagidiwa itiodataale nogojedi.”

<sup>39</sup>Odaa Jesus ja iige nigijo noiigi-nelegi me dilapodetibece me nicotiniwace miditaga nadegocawaanigi. <sup>40</sup>Odaa ja nicotiniwace ini lapo anidiwa onaniteci taalia oko, iniaageledi lapo onidiwa meya-taalia oko. <sup>41</sup>Odaa Jesus ja dibatetege nigijoa ciinco paantedi ijaagijoa itiwataale nogojedi, naga iwitedibigimece ditibigimedi, odaa ja diniotagodeteta Aneotedogoji. Odaa ja inoketedigi liwigotigi nigijoa paantedi, odaa yajigotediogi nigijo anodiotibece monediatiniwace nigidi noiigi-nelegi. Odaa jagaga ninoketedini nigijoa

nogojedi, odaa jogoyajigotiogi nigidi oko. <sup>42</sup>Odaa iditawece nigidi oko niodaga, codaa nitiminaga. <sup>43</sup>Nigidiaagidi nigijo anodiotibece jogonoleenagadi dooze etacani liwailidi nigijoa paontedi ijaagijoa nogojedi ane iigotedice anoyapitelogo nigijo oko. <sup>44</sup>Onicoa ciinco miili goneleegiwadi ane niodaga, pida baadogonilagadi nigaanigipawaanigi idiaa iwaalepodi anagaga niodaga.

### **Jesus ewaligitedeloco ditibigimedi ninyogodi**

*(Mateus 14.22-33; João 6.15-21)*

<sup>45</sup>Agica daga leegi Jesus iige nigijo anodiotibece mowaxoditinigi nagajo niwatece me dinewadetibigiwaji manitaga nigotakawaana ane liboonagadi Betsaida ane idei daato weiigi. Iige me igotibeci, nigijo naga ibodetediogi nigijo noiigi-nelegi. <sup>46</sup>Nigidiaagidi naga ibodetediogi nigijo noiigi-nelegi, Jesus jigigo manitaga aca wetiga me yotaganenege Aneotedogoji. <sup>47</sup>Nigijo naga doletibige me dalimeti aligege, nagajo niwatece ideitice liwigotinigi nigijo weiigi, idaa Jesus nenigidoatece digoida daato weiigi. <sup>48</sup>Pida naditediogi nigijo anodiotibece me dinoniciwagaditibigiwaji me nolaakanaga, leegodi odiitege niocodi. Nigijo naga ixomagatedice iniwatadagani lakata me nigoitijo, maleedaga yelogotigi, Jesus jigigo miditaga. Ewaligitedeloco ninyogodi, odaa domaga yewegitedijo. <sup>49</sup>Nigijo nogonadi Jesus mewaligitedeloco ditibigimedi ninyogodi, odaa odiletibige daga niwigo, odaa napaawagateloco. <sup>50</sup>Nacaagagateloco leegodi iditawece onaditege, odaa eliodi me doitibigiwaji. Pida agica daga leegi Jesus meetediogi, “Eloodagateeni gadaalegenalitiwaji! Jegemegee! Jinagadoiitiwaji!” <sup>51</sup>Odaa ja waxoditedinigi nagajo niwatece, odaa nigijo niocodi ja notokoti. Eliodi me nawelatibigiwaji, codaa agaleegoyowoogodi anee. <sup>52</sup>Igaataga agoyowoogodi nigica notoetiigi, idaagee monadi nigijo godoxicegedi aneote naga yowidagatee nigijoa paontedi, leegodi me dakake laalegenali.

### **Jesus icilatidi eliodi oko eelotaginadi miditaga nipodigi Genesaré**

*(Mateus 14.34-36)*

<sup>53</sup>Nigijo naga digetitacoace daato weiigi, odaa jogotota nipodigi Genesaré, odaa jogoigoetini nagajo niwatece liniogotibece weiigi. <sup>54</sup>Nigijo naga waxoditicoace nagajo niwatece, agica daga leegi, nigijo oko jogoyowoogoditege Jesus. <sup>55</sup>Odaa jogowalediteloco iditawece nipodigi, onadeegitalo niginoa eelotaginadi, nigina baanaga odiwoteloco nipe. Oyadeegiticogi nigijo anodi migotetece Jesus. <sup>56</sup>Odaa Jesus igotetedeloco nigicoa nigotadawaanaga, nigotadi codaa me nipodaga. Icoatawece nigicoa ane licoli, odaa idiaagoyaticoace nigijoa eelotaginadi aneitice nigina oko me dakapetibigiwage, odaa nigijo oko odipokotalo Jesus me ika nigijoa eelotaginadi mokexaa odibateloco laxabi nijayogo. Odaa ijotawece nigijo eelotaginadi anodibateloco nijayogo ja nicilaga.

**Liigaxinaganegeco laamipi judeutedi nigica jotigide**  
(*Mateus 15.1-9*)

**7** <sup>1</sup>Nigijoa fariseutedi ijaagijoa icoa niigaxinaganadi anodiigaxinagatece lajoinaganegeco Moisés oicogotocogi nigotaga Jerusalém. Odaa oyatecogotologo Jesus. <sup>2</sup>Onadi anigepidigica nigijjo anodiotibece Jesus moyeligo paon me dogoiwilegiteda libaagatedi, odaa jogodinapetegetege, leegodi бага lakatigi nigijjoa fariseutedi mecogotace niwilecaga nigeppaa nige niodaga.

<sup>3</sup>Leegodi nigijjoa fariseutedi codaa miditawece noiigi judeutedi odioteci lakatigi nigica laamipi. Agica anyeligo nige degele moiwilegi libaagatedi. <sup>4</sup>Nigijjo naga dopiticoace moicogotocogi balaacogolawaanaga aneitedice niginoa enaanaga, odaa ja diniwilegitibigiwaji. Codaa odioteci nigicoa eletidi nakataga, nigina moiwilegi goopatedi, bootitedi nelecoli, nooleli, codaa me nipeli.

<sup>5</sup>Odaa nigijjoa fariseutedi ijaagijoa nigijjoa niigaxinaganadi anodiigaxinagatece najoinaganegeco oige Jesus, moditalo, “Igame leegodi idiwa anodiotibigagadici me dogodioteci lakataga godaamipi, niodaga me dogoiwilegiteda libaagatedi?”

<sup>6</sup>Jesus ninigodi, meetediogi, “Akaamitiwaji nigina anokeo mele! Isaiás, nigijjo ane yatematitedibece Aneotedogoji lowooko nigijjo jotigide, eetece nigina anewi, nigijjo naga yalagatagawatiwaji. Maditaga lotaganagaxi Aneotedogoji iwoteloco nigica Isaiás ane yalagata, nigijjo negee nigica Aneotedogoji ligegi, anee, ‘Nigidi noiigi etidiwenigide nigina me notaganaga, pida agetidemaa catiwedi laalegenali, codaa leegitiwa metidetecetice.

<sup>7</sup>Agica jaoga nigina modogetetiwa, igaataga odiiigaxinagatece niginoa lowooko nigina oko micataga daga yowooko.’

<sup>8</sup>Odaa akaamitiwaji jigikani niginoa liigenatakanegeco Aneotedogoji, pida jigiwitecetiwaji lakataga niginoa goneleegiwadi nigina moiwilegi bootitedi, goopatedi, codaa mawii niginoa eletidi anicinoa.”

<sup>9</sup>Odaa Jesus meetediogi, “Inoa owidi ganimawenegecotiwaji me dagawii nigijjo liigenatakanegegi Aneotedogoji awiitibige makati me iwitece niginoa akamaga gadakatagatiwaji. <sup>10</sup>Igaataga Moisés mee nigijjo jotigide, ‘Awenigideni gadiodi aniaa gadiodo!’ Codaaeledi mee, ‘Leeditibige moyeloadi nigijjo oko ane beyagi me dotagatibige eliodi codaa me eliodo.’

<sup>11</sup>Pida menitibecetiwaji nigica oko anida nimawenegegi me yaxawa eliodi codaa me eliodo, pida nigeeta eliodi aniaa eliodo, ‘Ida Corban’ (ane diitigi ‘iboonigi ane jajigotalo Aneotedogoji’). Odaa agalee leeditibige me yaxawa eliodi aniaa eliodo. <sup>12</sup>Nigida aneni agaleegikanitiwaji nigijjo oko me yaxawa eliodi aniaa eliodo. <sup>13</sup>Jagawiitiwaji me digica ane jaoga liigenatakanegeco Aneotedogoji leegodi me iwitecetiwaji lakataga anetigadiigaxinitece gadaamipi. Jiginoatiwaji owidi eletidi gabatico nigida gabatiigi anejita.”

**Jesus yalagate nigica aneo me napioi godaalegena**  
(*Mateus 15.10-20*)

<sup>14</sup>Jesus eniditacediogi nigijo noiigi menagitacibeci midoataga, odaa meetediogi, “Akaamitawecetiwaji, ajipaatalo niginoa yotaga, codaa jemaa mowoogotitiwaji! <sup>15</sup>Inoatawece ane jelicaga jakatagata we, odaa dakatiwece gonioladi. Odaa nigina ane icogoticogi we anapioyagadi godaalegena. Pida niginoa notaga ane noditedicogi gonioladi, inaaginoa golidagataka ane icogotiwece godaalegena, jiginaagowo me napioi godaalegena. <sup>16</sup>Nigina oko anowajipatalo yotaga leeditibige mowatacotece.”

<sup>17</sup>Nigijo Jesus naga yetecetedicoace nigijo noiigi-nelegi, ja dakatediwece diimigi, odaa nigijo anodiotibece jogoige, moditalo, “Igame diitigilo ijoa gadotaga.” <sup>18</sup>Odaa meetediogi, “Latopiwatigi me dagagica anagaga owoogotitiwaji. Goweenigi ane dakatiwece gonioladi ayakadi me napioyagadi godaalegena. <sup>19</sup>Igaataga nigina niweenigi adakatiwece godaalegena, pida бага dakatinece gwokomaga, odaa nigidiaagidi ja noditice.” (Jigidaagee Jesus me ikee me jakataga me jelicaga okanicodaagica niweenigi.)

<sup>20</sup>Odaa Jesuseledi yalagata, mee, “Nigica ane napioyagadi nigina oko laalegena nigina ane noditice, ane icogotiwece laalegena, codaa niginoa lotaga ane icogotiwece nioladi. <sup>21</sup>Igaataga digawini nigina ane icogotiwece godaalegena; godowoko ane beyagi, ina me jilidagataga me godoomatewa lodawaeledi oko, codaa me ewocomigipi, ina me jilidagataga me jolicaga, codaa me jaijeega. <sup>22</sup>Odaa catiwedi godaalegena icogotiwece golidekico, codaa me jilidagataga me jaoga okanicodaagica ane beyagi, codaa me jiwitakaga, codaa me jaoga okanicodaagica nigina godolaadi ane yemaa meo, ina me godocetemaeledi oko, codaa me beyagi me jotaganagatibigeeledi oko, codaa meo moko anagaxakenegegi, codaa niginoa golidagataka owo me beyagi me jowookonaga micataga nigina yetole. <sup>23</sup>Inatawece nigina ane beyagi icogotiwece catiwedi godaalegena, odaa jegeo me napioi godaalegena.”

**Ica eliwagatakanegegi aca iwaalo ane daga judeu**  
(*Mateus 15.21-28*)

<sup>24</sup>Jesus noditedice nigijo aneitedice, odaa jigigo nipodigi ane ipegitege nigijoa nigotadi Tiro aniaa Sidom. Nigijo nigicotedio, odaa naga dakatediwece ica diimigi, adomaga yemaa digica ane yowoogodi miniwa catiwedi diimigi. Pida agica nimawenegegi me dinagaditedini. <sup>25-26</sup>Onaca aca iwaalo ane daga judeu, pida loiigi siro-fenicia. Onani aca liona ane dakatiogi niwigo abeyacegegi. Nigijo naga dibodicetigi Jesus, odaa agica daga leegi, odaa jigigo midoataga, odaa ja yamagatedini lokotidi lodoe. Odaa eliodi me dipokotalo Jesus me iticoitedice nigijo niwigo abeyacegegi ane dakatiogi liona. <sup>27</sup>Pida Jesus meeteta, “Nigina me niodaga, leeditibige modoejedipi nionigipi me

niodaga. Igaataga agele dogonoga liweenigi nionigipi, oditaga oyajigotiogi necexodi.”<sup>28</sup> Pida nagajo iwaalo ja igidi, meetalo, “Ewi, Iniwa-aagodi. Pida niginoda necexodawaanaga ane idi-iite catiwedi nameeja oyeligo niginoa latijedi nigina niga-aanigipawaanigi.”<sup>29</sup> Odaa Jesus ja igidi, meeteta, “Leegodi niginoa gadotaga ane ikee manakatoní Aneotedogoji, opiliticogi gadigeladi, igaataga niwigo abeyacegegi ja noditice majotaga nagajo gadiona.”<sup>30</sup> Nagajo iwaalo nigicoticogi ligeladi, odaa icoteloco nagajo liona me iwoteloco nipe, codaa nigijo niwigo abeyacegegi agaleegica, ja noditice majotaga nagajo liona.

### Jesus icilatidi ica goneleegiwa aticilonaga codaa me ewalagonaga

<sup>31</sup> Nigidiaagidi Jesus ja noditedicogi nigidi nipodigi ane ipegitege nigijoa nigotadi Tiro aniaa Sidom, odaa ja ixomagatedicogi nipodigi ane liboonagadi “Deez nigotadi”, odaa jigicotedicogi miditaga niweiigi Galiléia. <sup>32</sup> Odaa jogonadeegitalo Jesus ica goneleegiwa aticilonaga codaa me ewalagonaga, odaa jogodipokotalo Jesus me ipeketedeloco libaagatedi nigijo goneleegiwa me icilatidi. <sup>33</sup> Jesus yadeegitedicogi nigijo goneleegiwa wetice nigijo noiigi-nelegi, odaa yojogotediwece napaagate nigijo goneleegiwa yatite nibedona. Codaa yawale nibedona, odaa ja dibatedeloco loceligi nigijo goneleegiwa yocelate lawale. <sup>34</sup> Odaa iwitedibigimece ditibigimedi, odaa nikatedice laadi. Odaa mee, “Efatá!” nigina anejinagata, “Omoke!”

<sup>35</sup> Odaa agica daga leegi nigijo goneleegiwa ja wajipa, codaa jegele loceligi, odaa ja yakadi me dotaga. <sup>36</sup> Jesus iige nigijo anonadi me dogoyatemati nigijo godoxicegedi. Pida idaagida me domaga iigetediogi me dogoyatemati, pida jogoyatemati oigaxake nigijo anonadi. <sup>37</sup> Nigijo oko eliodi moyopo, odaa modi, “Inoatawece aneote, ele meote. Codaa eote niginoa aticilonadi me najipaaga, codaa niginoa ewalagonadi me notaganaga!”

### Jesus niodegetedini ica cwaatolo miili oko

*(Mateus 15.32-39)*

**8** <sup>1</sup> Nigijoa nokododi dinatecogoteetace nigica noiigi-nelegi, codaa agaleegica gaantokaagini anoyeligo. Odaa Jesus jegeniditediogi nigijo anodiotibece migotibeci midoataga, odaa meetediogi, <sup>2</sup> “Ja jiwikode nigina noiigi, igaataga jegeote itoatadigida nokododi mina meetaga, odaa agaleegica gaantokaagidi anoyeligo. <sup>3</sup> Daga jiigeticogi ligelatedi me digicata anoyeligo, odaa daga yemaa idi anenitiniwace naigitece leegodi nabocaga, igaataga idi ane icogoticogi ditigedi.”

<sup>4</sup> Odaa nigijo anodiotibece jogoigidi, moditalo, “Igamigetigida ica gonimawenegegi me jakataga paontedi me jiniodegenagatiniwace nigidi noiigi-nelegi? Igaataga nigina nipodigi agica nigeladimigipi.” <sup>5</sup> Odaa Jesus ja nigetediniwace, meetediogi, “Igame liwokodi ganipaontedi?” Odaa jogoigidi, moditalo, “Idiwa seete paontedi.”

<sup>6</sup> Odaa Jesus ja iige nigijo noiigi-nelegi monicotinigiigo. Odaa ja dibate nigijoa seete paontedi, odaa diniotagodete Aneotedogoji. Odaa naga inoketedigi liwigotigi

nigijoa paontedi, odaa ja yajigotediogi nigijoo anodiotibece monediatiniwace nigidi noiigi-nelegi. <sup>7</sup>Codaa aagaga idiwa onatecigidiwa nogojedawaanaga. Odaa Jesus diniotagodete Aneotedogoji leegodi nigijoa nogojedawaanaga, odaa jagaga iige nigijoo anodiotibece moyajigotiogi nigidi noiigi-nelegi. <sup>8</sup>Odaa ijotawece nigijoo noiigi niodaga, codaa nitiminaga. Nigidiaagidi nigijoo anodiotibece Jesus jogonioda nigijoa liwailidi ane iigotedice liwai paontedi ijaagijoo nogojedawaanaga, odaa jogonoleenagadi seete etacanitedi nelecoli. <sup>9</sup>Ejime cwaatolo miili oko ane niodaga.

<sup>10</sup>Nigidiaagidi Jesus ja iige mopitibeci nigijoo noiigi-nelegi, odaa agica daga leegi ja waxoditedinigi nagajo niwatece ijaagijoo anodiotibece, odaa jigigotibeci nipodigi Dalmanuta.

### **Icoa fariseutedi odipokotalo Jesus meote ica godoxicegedi**

*(Mateus 12.38-42; 16.1-4)*

<sup>11</sup>Icoa fariseutedi igotibeci midoataga Jesus, odaa jigidaagoyatigi modinotigimadetege. Odineetalo Jesus, joanigidaa leegodi modipokotalo meote godoxicegedi ane ikee mida nimawenegegi Aneotedogoji midoataga. <sup>12</sup>Odaa Jesus nikatedice laadi leegodi yopo laalegenali me dagaxa me dakake, odaa meete, “Igame leegodi nigina oko ane newiga niginoa nokododi monipokotiwa me jao godoxicegedi me jikee me idimonya Aneotedogoji? Ejitagawatiwaji ajao godoxicegedi lodoe nigina oko me jikee Aneotedogoji me idimonya.”

<sup>13</sup>Odaa Jesus ja yetecetedicoace nigijoa fariseutedi. Ja waxoditacedinigi nagajo niwatece, odaa jigigotace daato weiigi.

### **Jesus yalagate lakatigi fariseutedi ijaa inionigi Herodes, iciaceeketetege labookojegi aneo me ili leyeema moyoe paon**

*(Mateus 16.5-12)*

<sup>14</sup>Nigijoo anodiotibece Jesus oyaagiditece dogoyadeegi paon. Pida onidi oniditeci paon mijotaga catinedi nagajo niwatece. <sup>15</sup>Odaa Jesus jegeote leemidi, meetediogi, “Digawiniti waji! Adinowetitege nabookojegi fariseutedi ijaa inionigi Herodes!”

<sup>16</sup>Odaa jigidaa diiticogi me dinotigimadeti wage, modi, “Eote nigida ligestedogowa leegodi me daga inadeegagateda paontedi.” <sup>17</sup>Jesus yowoogodi nigijoo anodinotigimadeti, odaa meetediogi, “Igame leegodi madinotigimadeniti wage me digicoa ganipaontediti waji manadeegi? Icaagina dagalee dogowoogotiti waji nigijoo ananati. Codaa icaagina daga akakagati gadaalegenaliti waji me daga adinakatoni. <sup>18</sup>Idiwa gagecoogeli, pida agodogowoogotiti waji niginoa ananati. Codaa idiwa ganapaagatedi, pida agodogowoogotiti waji niginoa anajipaatalo. Aganalakitibigetiti waji nigijoo yoenataka. <sup>19</sup>Nigijoo naga ininoketedini nigijoo ciinco paontedi, odaa ja jiniodegetedini nigijoo ciinco miili goneleegi wadi, igame liwokodi etacanitedi nelecoli ane nolee liwailidi ane iigotedice ananiodaati waji?” Odaa jogoigidi, moditalo, “Nigijoo noko jenaagatigilo dooze etacanitedi nelecoli.”

<sup>20</sup>Odaa Jesus ja nigetacediniwace, meetediogi, “Codaan nigijjo naga ininoketedini nigijjoa seete paontedi me jajigotiogi nigijjoa cwaatolo miili oko, igame liwokodi etacantedi nelecoli ane nolee liwailidi ane iigotedice ane aniodaa?” Odaa jogoninigodi, moditalo, “Nigijjo noko baga jenagatigilo seete etacantedi niginoan nelecoli.” <sup>21</sup>Odaa Jesus meetediogi, “Pida ica ina dagalee dogowoogotitedatiwaji nigijjoa ananati.”

### **Jesus icilatidi ica etoinaga ane icogoticogi nigotakawaana Betsaida**

<sup>22</sup>Jesus ijaagijjo nigijjo anodiotibece jogototicogi manitaga nigotakawaana Betsaida. Ijo ica oko anonadeegitalo ica etoinaga, odaa jogodipokotalo me dibatedeloco me icilatidi nigijjo etoinaga. <sup>23</sup>Odaa Jesus ja dibatedigi libaagadi nigijjo etoinaga, odaa nogatedicogi nagani nigotakawaana. Odaa Jesus yawaletediwece ligecoogeli nigijjo etoinaga, odaa ja dibatedeloco ligecoogeli, odaa ja ige, meeteta, “Nigica ananati?” <sup>24</sup>Odaa nigijjo goneleegiwa naga nawacetibige lacilo me dole, odaa mee, “Jinadi nigina oko midiaanagadi, pida liciagi niginoan nialeli.” <sup>25</sup>Odaa Jesus ja dibatacedeloco ligecoogeli nigijjo etoinaga, odaa iigetaceda me doletibece. Odaa agica daga leegi ligecoogeli nigijjo goneleegiwa ja ici, odaa yakadi mepaanaga doletibece. <sup>26</sup>Odaa Jesus ja iige mopiticogi ligeladi, codaa meeteta, “Jinagakaatiwece nagani nigotakawaana, codaa jinigica anatematitiita manitaga nagani nigotakawaana nigida ane jaotagadomi.”

### **Pedro yelogodi anijoa Jesus** (*Mateus 16.13-20; Lucas 9.18-21*)

<sup>27</sup>Ica noko Jesus ijaagijjo nigijjo anodiotibece jigigotibeci midiwataga nigotadawaanaga miditaga nipodigi ane liboonagadi “Cesaréia Filipe ane dabitegetini”. Odaa naigitece mewaligitibigiwaji, Jesus nigetediniwace, meetediogi, “Ina oko, amigida ica anodiletibige ane Ee?”

<sup>28</sup>Odaa jonigica anoigidi, moditalo, “Inatecibece oko modi makaami João Batista, pida inatecibeceeledi modi makaami Elias, codaa inaeledi bogoditibige makaami anigepidigica nigijjo anoyelogoditedibece Aneotedogoji lowooko nigijjo jotigide.”

<sup>29</sup>Odaa jagaga nigetediniwace, meetediogi, “Pida bagakaamitiwaji, amakati me Ee?” Odaa Pedro ja ninigodi, meetalo, “Akaami Nigijjo Aneotedogoji ane niige godatamagateenegegitege godaxakawepodi.”

<sup>30</sup>Odaa Jesus ja najoitediniwace me dogoyatematitibece anijoa.

### **Jesus yatemati micota me dawikode, codaa yalagate me leeditibige me yeleo** (*Mateus 16.21-28; Lucas 9.22-27*)

<sup>31</sup>Odaa Jesus jigidaageyatedigi me niigaxitediniwace nigijjo anodiotibece me leeditibige meliodi me dawikode, mijoa me Goneleegiwa ane icogotedibigimece ditibigimedi. Codaa me leeditibige nigijjo laxokodipi lacilodi nigidi noiigi, ijaagijjo nigijjo anoiige sacerdotitedi, ijaagijjo niigaxinaganadi anodiigaxinagatece



lajoinaganegeco Moisés, miditawece agodibatege Jesus. Codaa me leeditibige me yeleo, pida yewigatace nige ixomagatedijo itoatadigida nokododi. <sup>32</sup>Jesus igenagatece nigijoa lotaga. Odaa Pedro ja yadeegitedice me ideite liwigotigi nigijo anodiotibece, odaa jigidaageyatigi me yapetege Jesus. <sup>33</sup>Pida Jesus nilokotediogi, me niipetediogi nigijo anodiotibece, odaa ja yapetege Pedro, meeteta, “Otonitice yodoe, Satanás! Nigida makaami mowookoni gadiciagi nigina eledi oko me nowookonaga, pida agowookoni daga gadiciagi Aneotedogoji me dowooko.”

<sup>34</sup>Nigidiaagidi Jesus eniditediogi nigijo noiigi-nelegi ijaagijo anodiotibece me enagitibeci midoataga. Odaa meetediogi, “Nigica oko ane yemaa me niotici, leeditibige me ika me dioteci nigica anepaa yemaa, codaa leeditibige me igotema me dawikode nigepaa yeleo inoatawece nokododi, codaa me igotema moyametibigo leegodi me niotici, odaa бага yakadi me niotici. <sup>35</sup>Igaataga nigina oko aninoka doletibige me dinowedi, nigini oko icota me yeleo nigepaa ganigicibige. Pida nigina oko ane yeleo leegodi me niotici, codaa me leegodi me yatematitedibece nibodicetedi anele anoyalagatiwa, nigini oko бага yewigatace nigidiaagidi. <sup>36</sup>Nigica oko ane yakadi inoatawece aninoa nigina iigo, pida nige yeleo, odaa agica aneletema ijoatawece nigijo ane yakadi. <sup>37</sup>Nigina oko agica gaantokaagini ane yakadi me yajigotalo Aneotedogoji me yakadi lewiga ane digica liniogo. <sup>38</sup>Odaa nigina oko ane dinibolikatiditici, codaa me dinibolikatiditece niginoa yotaga nigina mini liwigotigi nigina oko ane digika mowo dogonakato Aneotedogoji niginoa nokododi, codaa aneliodi me abeyacagaga, odaa aagaga idinibolikatiditece nigina oko ane dinibolikatiditici nige idopitacijo me ixigagawepodi nigijoa aanjotedi anodibatema iniokiniwateda Aneotedogoji. Odaa Ee, Goneleegiwa ane jicogotibigimece ditibigimedi, jikee inagetetigi me iciagi Eiodi nagatetigi.”

**9** <sup>1</sup>Odaa Jesus meetediogi nigijo noiigi, “Ejitagawatiwaji nigina anewi. Inatibece oko digoina anaga nigo nigonadi Aneotedogoji nigidaageyatedigi me iige laalegenali oko yatite nimawenegegi.”

### **Elias ijaa Moisés oyotaganegge Jesus**

*(Mateus 17.1-13; Lucas 9.28-36)*

<sup>2</sup>Naga ixomagatedijo seis nokododi, odaa Jesus yadeegi Pedro, Tiago ijaa João. Yadeegitedicogi maditaga aca wetiga ane leegitibigimece ane digica oko anodipegetege. Nogoiwitalo Jesus, odaa jejeledi latopagi. <sup>3</sup>Nigijoa lowoodi Jesus ja datale, dagaxa me yapacaga, caticedi okanicodaagaca lapacogogo ane yabake nabakenaganagalo. <sup>4</sup>Odaa nigijo itoatadigida anodiotibece jogonadi Elias ijaa Moisés anoicogotibigimece ditibigimedi moyotaganegge Jesus. <sup>5</sup>Odaa Pedro jegeetalo Jesus, “Goniigaxinogodi, ejimele minaagejonagatice digoina. Jaogate idabitegenagatedi iniwatadigini nopecetiidi, oniniteci ganebi, ini eledi Moisés, iniaageledi бага Elias nebi.” <sup>6</sup>Pida ayowoogodi nigica lowoogo meo nigijo ligegi, leegodi nigijo itoatadigida anodiotibece eliodi me dootibigiwaji.

<sup>7</sup>Odaa ja dinikatini ica lolaadi ane yapogoditiniwace, odaa jogowajipatalo Aneotedogoji me dotaga catiwedi nigijo lolaadi, mee, “Nigidoa jigidaa Ionigi yemaanigi. Ajipaatalo niginoa lotaga!” <sup>8</sup>Codaa nagonida nigijo anodiotibece nogoiwiteloco niginoa liwailidi, odaa jogonadi idokaaniginoateda Jesus miditaga.

<sup>9</sup>Maleegidaagee me dinikatiniwace nagajo wetiga, Jesus najoitediniwace, meetediogi, “Jinaga atematiitiwaji nigijo ananati nigepaagicota me idewigatace Ee, Goneleegiwa ane jicogotibigimece ditibigimedi.”

<sup>10</sup>Odaa oyiwagadi nigijo Jesus liigenatakanegegi, agica anoyatematita. Idokida modinotigimadetigi nigica ane diitigi nigijoa lotaga Jesus me yalagata me yewigatace. <sup>11</sup>Odaa jogoige Jesus, moditalo, “Igame leegodi nigijo niigaxinaganadi anodiigaxinagatece lajoinaganegeco Moisés modi Elias modoejegi meno, odaa nigidiaagidi jagagenagi Nigijoa Aneotedogoji ane niige me godatamagateetege godaxakawepodi?”

<sup>12</sup>Jesus ja igidi, meetediogi, “Ewi Elias nogodojegi meno me ilakidetema naigi Nigijo Aneotedogoji ane niige. Pida igrage leegodi nagajo lotaganagaxi Aneotedogoji me yalagata nigijo Goneleegiwa ane icogotibigimece ditibigimedi meliodi me dawikode, codaa nigina oko mododigota micataga nigina naagogo? <sup>13</sup>Pida ejitagawatiwaji Elias jigijo meno, odaa jogowo ane beyagitema nigica anepaagoyemaa modigota, anodaagee me yalagata Aneotedogoji lotaganagaxi maleedigicota nigida niciagi.”

### **Jesus icilatidi ica nigaanigi ane dakatiogi niwigo abeyacegegi**

*(Mateus 17.14-21; Lucas 9.37-43)*

<sup>14</sup>Nigijo nogodipegitigi nigijo eledi anodiotibece, odaa jogonadi nigijo noiigi-nelegi monawiile. Codaa onidi nigijoa niigaxinaganadi anodiigaxinagatece lajoinaganegeco Moisés modinotigimadetege.

<sup>15</sup>Nigijo noiigi nagonaditege Jesus, odaa eliodi moyopo, odaa jogowaleditege moyecoaditece. <sup>16</sup>Odaa Jesus nigetediniwace nigijoa niigaxinaganadi, meetediogi, “Amiini ica ane adinotigimadenitigitiwaji?”

<sup>17</sup>Odaa ica goneleegiwa liwigotigi nigidi noiigi ja igidi, meetalo, “Goniigaxinogodi, inadeegitagawa ionigi ini niwigo abeyacegegi aneo me daga yakadi me dotaga. <sup>18</sup>Codaa nigica niwigo idioka limedi me dibata, odaa yokoletinigiigo. Codaa natiatigi nioladi, yacigice lowe, codaa me dinawigice. Ja domaga jipokotiogi nigidi anodiotibigagadici moiticoitice nigijo niwigo abeyacegegi, pida jogoyapi.”

<sup>19</sup>Odaa Jesus ja igidi, meeteta, “Jagakamagakaamitiwaji nigica noiigi ane dogoyiwagaditeda Aneotedogoji. Igamige liwokodi nokododi ane leeditibige minaagejotice makaamitagatiwaji? Igamige liwokodi nokododi jakadi me idinatitagawatiwaji leegodi me daga adadiwagati? Anadeegitiwa nigini nigaanigawaanigi!” <sup>20</sup>Odaa jogoyadeegitalo nigijo nigaanigawaanigi. Nigijo niwigo abeyacegegi naga nadi Jesus, odaa ja yaxilaketibece nigijo nigaanigawaanigi, odaa nigijo nigaanigawaanigi jegenitinigiigo, dinawililetibece,

natiatigi nioladi. <sup>21</sup>Odaa Jesus ja ige eliodi nigijo nigaanigi, meeteta, “Akaagidokee?” Odaa ja igidi, meetalo, “Nigijo malee nigaanigawaanigi naga leelotagi. <sup>22</sup>Jegeliuditibece niwigo abeyacegegi me doletibige me yeloadi, idatecibece eo me dinaxogotiogi noledi codaa me ninyogodi. Natigide nigakati mawii me icí ionigi, godiwikodenegegi, codaa godaxawanegegi!”

<sup>23</sup>Odaa Jesus meeteta, “Ageliodi gatiwagatakanenegegi alawini menitiwa, ‘Nigakati’. Aneotedogoji yakadi meote okanicodaagica loenatagitetema nigina oko ane nakato.” <sup>24</sup>Odaa agica daga leegi nigijo eliodi nigijo nigaanigawaanigi jaganoe, dapaawe, meetalo, “Iniotagodi, jinakato Aneotedogoji, codaa adaxawani mepaanaga jinakato!”

<sup>25</sup>Nigijo Jesus naga nadi eliodi oko ane odinatecogoteetelogo, odaa ja yapetege nigijo niwigo abeyacegegi, meeteta, “Niwigo abeyacegegi anawii nigidi nigaanigi me daga yakadi me dotaga otegeaagaga wajipa, gadiigeni manotiticogi nigidi nigaanigi, codaa jinagaleegakaatiogi!”

<sup>26</sup>Odaa nigijo niwigo abeyacegegi ja dinigetagee me dacaage, ecogotace eo me dinaxilaketibece nigijo nigaanigi, odaa ja noditice. Nigidi nigaanigi ja liciagi nigina émegegi, odaa eliodi oko modi, “Ja yeleo!” <sup>27</sup>Pida Jesus dibatedigi libaagadi nigijo nigaanigi, odaa ja yaxawa me dabiditini.

<sup>28</sup>Nigidiaagidi Jesus ja dakatediwece ica diimigi, onijoateci ijaagijo anodiotibece, odaa nigijo anodiotibece jogoige, moditalo, “Igamige leegodi me daga jakataga me jiticodagatice nigijo niwigo abeyacegegi?” <sup>29</sup>Odaa Jesus ja igiditiedigi, meetediogi, “Idoka akati miticoitice liciagi nigijo niwigo abeyacegegi nigina mecogotace otaganegenitiwaji Aneotedogoji.”

### **Jesus yalagatace me yeleo, codaa me yewigatace**

*(Mateus 17.22-23; Lucas 9.43-45)*

<sup>30</sup>Jesus ijaagijo nigijo anodiotibece ja noditicogi nigidi nipodigi, odaa ja ixomagaticogi miditaga nipodigi Galiléia. Jesus adomaga yemaa digica ane yowoogodi ane digetedicogi, igaataga domaga yemaa me niigaxitediniwace idiokidi nigijo anodiotibece. <sup>31</sup>Nigijo naga niigaxitediniwace, meetediogi, “Icota metidajigotiogi niginoa goneleegiwadi gonegaga, odaa nigidiwa goneleegiwadi etideloadi, Ee, Goneleegiwa ane jicogotibigimece ditibigimedi. Pida nige ixomagatedijo itoatadigida nokododi me ideleo, odaa ja idewigatace.”

<sup>32</sup>Pida nigijo anodiotibece agoyowoogodi nigica ane diitigilo nigijoa lotaga. Pida jogodoitalo dogoigetece Jesus ica ane diitigilo nigijoa lotaga.

### **Jesus diigaxinatetece anodaagee nigica ane dagaxa me gonegegi**

*(Mateus 18.1-5; Lucas 9.46-48)*

<sup>33</sup>Jesus ijaagijo nigijo anodiotibece jigicotiibece nigotaga Cafarnaum. Nigijo naga idiaagitice ligeladi, odaa Jesus ja nigetediniwace, meetediogi, “Amiini ica ane adinotigimadenitigitiwaji naigitece?”

<sup>34</sup>Pida notokotiniwace, agica gaantokaagida ligegi nigijo anodiotibece, igaataga naigitece odinotigimadetigi nigica ane dagaxa me gonegegi liwigotigi. <sup>35</sup>Jesus nicotedini, odaa jegeniditediogi, meetediogi, “Nigina oko gadiwigotigitiwaji ane yemaa me idei odoejegi nimedi, nigini oko leeditibige mowidijegi, codaa me gaotagitiwaji.” <sup>36</sup>Odaa ja dibate ica nigaanigawaanigi, odaa ideyatedice liwigotigi. Odaa ja ibedotetece nigijo nigaanigawaanigi, odaa meetediogi nigijo anodiotibece, <sup>37</sup>“Nigina oko ane dibatege nigaanigawaanigi liciagi nigini nigaanigawaanigi me Ee leegodi, nigini oko dibatigi. Odaa nigina oko ane dibatigi, agemoka dibatigi, pida aagaga dibatege Nigijoa ane idimonya.”

**Jesus diigaxinagatetece nigina oko ane daga lakapetegiteda, odaa nigini oko anida aneetege**  
(*Lucas 9.49-50*)

<sup>38</sup>João meetalo Jesus, “Goniigaxinogodi, jinataga ijo goneleegiwa ibake Gaboonagadi me iticoitedice niwicidi abeyacagaga, odaa ja joxokojogo me ibake Gaboonagadi, leegodi adiotibigagadici daga godiciagi.” <sup>39</sup>Odaa Jesus meeteta, “Jinogoxoki eledi oko me ibake Iboonagadi, igaataga agica ini ane yakadi me ibake Iboonagadi meo godoxicegedi, oditaga aleegi odaa ja beyagi me dotagatibigiji. <sup>40</sup>Igaataga nigina oko ane daga godakapetegi, nigini oko ida anejinagatege. <sup>41</sup>Igaataga nigina oko ane yajigotagawatiwaji goopa ninyogodi leegodi mida anenitigi, Ee ane idimonya Aneotedogoji me jewikatiditace nigina oko. Ejitagawa nigina anewi, Aneotedogoji yajigote nogeedi anele nigini oko.”

**Anodaa leeditibige minigata gobeyacegegi**  
(*Mateus 18.6-9; Lucas 17.1-2*)

<sup>42</sup>Jesus egidaagee me dotaga, odaa meetediogi, “Nigica aneo oniniteci nigidi nigaanigipawaanigi meyamagatice eliwagatakanegegi, odaa ejimetaga dagaxa mele dogoigoetece lotoinagadi wetiga nelegi liciagi nagana wetiga anoibake monidi leyeema, oditaga oyokoletinigi akiidi-eliodi. <sup>43</sup>Gabaagadi nigeo mabataa, ejimetaga dagaxa mele makagiti, oditaga onanigidatece gabaagadi, pida akaatiwece aneitedice Aneotedogoji midioka limedi makaami miniwataga. Aliciagi daga idoatawece gabaagatedi, pida etigadokoleniticogi miditaga aneite nawikodico minitaga noledi ane daga ipe. <sup>44</sup>Digoida idioka limedi midiwa nigojokodi anyeligo lolaadi nigina émegegi, codaa noledi agica daga ipe. <sup>45</sup>Gadogonagi nigeo mabataa, ejimetaga dagaxa mele makagiti, oditaga akaami alejaado, pida akaatiwece Aneotedogoji aneitedice midioka limedi makaami miniwataga. Aliciagi daga idoatawece gadogonaka, pida etigadokoleniticogi miditaga aneite nawikodico minitaga noledi ane daga ipe. <sup>46</sup>Digoida idioka limedi midiwa nigojokodi anyeligo lolaadi niginoa émagaga, codaa noledi ane daga ipe. <sup>47</sup>Gagecooge nigeo mabataa, ejimetaga dagaxa mele manogaa onaniteci gagecooge, oditaga onaniteci ganeike, pida akaatiwece aneitedice Aneotedogoji midioka limedi makaami miniwataga.

Aliciagi daga idiwatawece gagecoogeli, pida etigadokoleniticogi minitaga noledi ane daga ipe, aneite nawikodico. <sup>48</sup>Digoida idioka limedi midywa nigojokodi anoyeligo lolaadi niginoa émagaga, codaa noledi ane daga ipe.

<sup>49</sup>Nigina monigodi niginoa eijedi anoibootema Aneotedogoji, odaa onocie libole me dogoika me beyagi maleedogoyalegi, jigidagagaae niginoa godawikodico, dapicogo liciagi nigina noledi, odaa eo gotiwagatakanegegi me daga beyagi, pida jedgepaanaga datiteti. <sup>50</sup>Ele me jibakenaga yoci, pida nigina yoci nige naganiaditema libayodaga, odaa agaleegica gonimawenegegi daga jaogatace me bayodi. Micataga nigina yoci me daga ika libole me beyagi, idagagaeni jinigikani gaantokaagini ane ibeyacagadi gademaanaganegegi anida makaamitagatiwaji, jinaga adinotigimadeni, otegexaagaga adinidelegenitiwagatiwaji.”

### Jesus diigaxinaga yalagata nalataganegegi

(Mateus 19.1-12; Lucas 16.18)

**10** <sup>1</sup>Nigijo Jesus naga noditedicogi nipodigi Galiléia, odaa jigigo miditaga nipodigi Judéia, daato akiidi Jordão. Ica noiigi-nelegi odinatecogoteetacelogo, codaa modipegitalo, odaa ja niigaxitacediniwace, ane ligilegegi.

<sup>2</sup>Icoa fariseutedi igotibeci midoataga, odaa jogoige, moditalo, “Ica gonajoinaganegegi domige ika ina goneleegiwa me yaladi lodawa?” Domogodoletibige me nilaagedi Jesus mowote nigijoa lotaga. <sup>3</sup>Nigijo Jesus naga ninigoditediogi, odaa ja nigetediniwace, meetediogi, “Amiini ica Moisés ane iigetagawa mawitiwaji?” <sup>4</sup>Odaa jogoigidi, moditalo, “Moisés ika nigina goneleegiwa meo idi notaganagaxi ane yalagata me yaladi lodawa, odaa yakadi me iige mopi.”

<sup>5</sup>Odaa Jesus ja igidi, meetediogi, “Moisés iditini nigida lajoinaganegegi leegodi gadaalegenali me dakake. <sup>6</sup>Pida nigijo Aneotedogoji negeote inoatawece aninoa, jigidaa ane yalagata Aneotedogoji lotaganagaxi, mee, ‘Aneotedogoji eote goneleegiwa aniaagiwaalo. <sup>7</sup>Joanigidaa leegodi goneleegiwa me ika eliodi, eliodo nigina naga lodawa nagana lodawa. <sup>8</sup>Odaa nigijo itoataale ja micataga dogokinitece oko.’ Odaa jigidaagee agalee liciagi miniwataale oko, pida ja micataga dogokinitece oko. <sup>9</sup>Odaa nigina Aneotedogoji ane yadonegetediwage, agica oko ane yakadi me yawalacetiwage.”

<sup>10</sup>Nigijo naga idiaagitice minitaga ica diimigi ane lotokagadi, odaa nigijo anodiotibece Jesus jogoigetece ane diitigilo nigijoa lotaga. <sup>11</sup>Odaa Jesus meetediogi, “Nigina goneleegiwa ane yaladi lodawa, odaa nige lodawaeledi iwaalo, odaa ja igolagadi nagajo odoeje lodawa. <sup>12</sup>Codaa nagana iwaalo ane yaladi lodawa, nige lodawaeledi goneleegiwa, odaa ja igolagadi nigijo odoejeje lodawa.”

### Jesus ibinietediogi ica nigaanigipawaanigi

*(Mateus 19.13-15; Lucas 18.15-17)*

<sup>13</sup>Ica noiigi oyadeegitalo Jesus nigaanigipawaanigi me ipeketedeloco libaagatedi me ibinietediogi. Pida nigijo anodiotibece jogodowocetege nigijo oko anonadeegi lionigipi. <sup>14</sup>Pida Jesus naga nadi nigijo anodiotibece nigica anowote, odaa ja yelatetema, odaa meetediogi, “Ikanitiwaji nigina nigaanigipawaanigi menagitibeci meetaga, jinaga oliitege menagitibeci meetaga, igaataga Aneotedogoji iige laalegenali nigina oko ane liciagi nigina nigaanigipawaanigi. <sup>15</sup>Ejitagawatiwaji nigina anewi. Aneotedogoji aiige laalegena nigina oko ane daga dibatege anodaagee nigina nigaanigawaanigi me dibatege.” <sup>16</sup>Odaa Jesus nibedotedi nigijo nigaanigipawaanigi, odaa ja ipeketedeloco libaagatedi me ibinietediogi.

### Ica goneleegiwa liico dakapetege Jesus

*(Mateus 19.16-30; Lucas 18.18-30)*

<sup>17</sup>Nigijo Jesus naga idaa diitacedicogi me diniwiaje, odaa ica goneleegiwa walokoditege, odaa ja yamagatedi lokotidi lodoe Jesus. Odaa ja ige, meetalo, “Iniigaxinogodi anele, amiida ica ane leeditibige me jao midioka limedi me idewiga miniwataga Aneotedogoji?”

<sup>18</sup>Odaa Jesus meeteta, “Igame leegodi menitiwa me Ee ele? Agica anele, iniokiniwateda Aneotedogoji mele. <sup>19</sup>Jogowoogoti liigenatakanegeco Aneotedogoji. Aneotedogoji godiige, meete, ‘Jinaga aijee, jinaga agolagatakani, jinaga olice, codaa jinaga ilikoni. Awenigideni gadiodi, codaa me gadiodo.’ Codaa jinaga inaaleni eledi oko manogaa ane nebi.”

<sup>20</sup>Odaa nigijo goneleegiwa ja igidi, meetalo, “Iniigaxinogodi, idioka limedi me jeemitetibige idiwatawece nigidiwa niigenatakanegeco nigijo maleege nigaanigi codaa nigina natigide.”

<sup>21</sup>Jesus naga iwiteta, odaa eliodi me yemaa, odaa meeteta, “Onanigidadece ane leeditibige mawii. Aani nigicoa ane ganepilidi, odaa edianitece ganinyeelo nigina madewetedipi. Odaa jigidaa Aneotedogoji nige yajigotedagawa owidi ganepilidi digoida ditibigimedi. Odaaganagi, pida leeditibige me gadigomi mawikodee nigepaa gadelewi, odaa bagakati maniwitici.” <sup>22</sup>Nigijo goneleegiwa naga wajipatalo nigijoa lotaga Jesus, odaa deemitetece catiwedi laalegena dakake meo nigijo aneeteta Jesus. Odaa eliodi magecagalo, odaa jogopi, leegodi owidi nigicoa ane nepilidi.

<sup>23</sup>Odaa Jesus niipetediogi nigijo anodiotibece monawiile, odaa meetediogi, “Ica me dakake Aneotedogoji me iige laalegena nigina liico!”

<sup>24</sup>Nigijo anodiotibece eliodi me nawelatibigiwaji nigijo nogowajipatalo nigijoa lotaga. Pida Jesus egidaagee me dotaga, meetediogi, “Ionigipi, dakake Aneotedogoji me iige laalegena nigina oko ane dinagakatiditalo nigina ane nilliicagajetecidi! <sup>25</sup>Enegegi dakake Aneotedogoji me iige laalegena nigina liico, aliciagi gameelo me dakatiwece etakado lawimagajegi.”

<sup>26</sup>Nigijo anodiotibece nogowajipatacalo nigijoa lotaga, odaa nawelatacibigiwaji. Odaa ja dinigetiwage, modi, “Enice, amigijo ica ane yakadi midioka limedi me yewiga miniwataga Aneotedogoji?”

<sup>27</sup>Odaa Jesus naga niipetacediogi, odaa meetediogi, “Nigina oko agica nimawenegegi degepaagowo midioka limedi me newiga miniwataga Aneotedogoji, pida Aneotedogoji bigida nimawenegegi. Codaa yakadi meote okanicodaagica, agica idi ane daga yakaditeda meote.”

<sup>28</sup>Odaa Pedro jigidaageyatedigi me yotaganenge Jesus, meetalo, “Digawini! Ja jikanagatedice ijoatawece ane gonepilidi leegodi me jiwagatibigagadi.”  
<sup>29</sup>Jesus ja igidi, meeteta, “Ejitagawa nigina anewi. Inatawece oko anoyaladi ligeladi, nioxoadipi, codaa me niwaalepodi, eliodi, eliodo, lodawa, lionigipi, codaa me niginoa niigotedi Ee leegodi, codaa me leegodi me yatematitedibece nibodicetedi anele, <sup>30</sup>Aneotedogoji yajigote nigini oko caticedi nigicoa ane yaladi malee newiga nigina iigo. Aneotedogoji yajigote anige liwokodi taalia caticedi ane liwokodi nigica anoyaladi. Codaa nigini oko dinigaanyetece ligelatedi, nioxoadipi, niwaalepodi, eliododipi, nigaanigipawaanigi, codaa me niigotedi. Codaa icota moiatetibeci, pida nigidiaagidi idioka limedi me yewiga miniwataga Aneotedogoji. <sup>31</sup>Eliodi oko ane dagaxa me gonegaga niginoa nokododi digoina iigo, nigidi oko icota me iwikodadipi. Odaa eliodi oko ane iwikodadipi niginoa nokododi, nigidi oko icota me dagaxa me gonegegipi.”

### **Jesus yalagatace moyeloadi**

*(Mateus 20.17-19; Lucas 18.31-34)*

<sup>32</sup>Jesus ijaagijo anodiotibece egidaagee mewaligitibigiwaji, odaa jogodowicetibigimece manitaga nigotaga Jerusalém. Jesus igo lodoe nigijo anodiotibece odaa one oyopo. Nigijo oko anodiotibece dootibigiwaji. Odaa Jesus jegeniditediogi nigijo dooze anodiotibece, ixipetedicoace. Odaa yelogoditediogi ane ninyaagi. <sup>33</sup>Meetediogi, “Digawini! Ja jowicagata nigotaga Jerusalém. Odaa Ee, Goneleegiwa ane jicogotibigimece ditibigimedi etidajigotiogi nigijo anoiige sacerdotitedi, ijaagijoa nigijoa niigaxinaganadi anodiigaxinagatece lajoinaganegeco Moisés. Odaa modi me leeditibige metideloadi, codaa aagaga etidajigotiogi nigijo ane daga judeutedi. <sup>34</sup>Odaa nigidi ane daga judeutedi oyametibigiji, etidalaketibige, codaa metidawaletice, odaa jegetideloadi. Pida nigidiaagidi nige ixomagatedijo itoatadigida nokododi, odaa ja idewigatace.”

### **Tiago ijaa João ida nipoketegitalo Jesus**

*(Mateus 20.20-28)*

<sup>35</sup>Tiago ijaa João ane lionigipi Zebedeu, jigigotibeci odipegitalo Jesus, odaa moditalo, “Goniigaxinogodi, jemaanaga mawiiotogodomi ane jipokagatagawa.”  
<sup>36</sup>Odaa Jesus nigetediniwace, meetediogi, “Amiini ica anemaanitiwaji me jaotagadomi?” <sup>37</sup>Odaa jogoigidi, moditalo, “Nigina Aneotedogoji nige

gadinelecagateeni, nigicota me iigeni inoatawece, godikanegegi me godicote gawai oniniteci digetege gabaagadi iniaageledi digetege ganimagijegi.”

<sup>38</sup>Pida Jesus meetediogi, “Agowoogotitiwaji nigica anipokitibige. Domigakatitiwaji mawikodee anodaageji me jawikode, codaa domige akatitiwaji mawikodee nigepaa gadelewi anodaageji me ideleo?” <sup>39</sup>Odaa jogoigidi, moditalo, “Jakataga!” Odaa Jesus meetediogi, “Awikodeetiawaji anodaageji me jawikode, codaa me gadelewi, anodaageji me ideleo.

<sup>40</sup>Pida agica inagatetigi degejitagawatiwaji me akati manicootini ibaagadi, iniaageledi inimagijegi. Aneotedogoji yajigote nigidiwa nimetiidi nigica oko anepaa iolatedice me nicoteloco.”

<sup>41</sup>Nigijoeledi deez anodiotibece Jesus owajipata nigijo Tiago ijaa João anodipokotalo Jesus, odaa jogoyelatema. <sup>42</sup>Odaa Jesus jegeniditediogi modipegitalo, odaa meetediogi, “Nigijo anoditiogi me godacilodi, owoogotitiwaji me lemaanigi me iige nigina oko, codaa nigina oko anodiletibige niginaeledi oko digida nagatetigi, nigijo oko lemaanigi me ibake epaanaga nagatetigi. <sup>43</sup>Iniingidaagenitiwaji digo miditaga. Pida nigina ane yemaa mida nagatetigi gadiwigotigitiwaji, nigini oko leeditibige makaamitawece dibatagadomitiwaji. <sup>44</sup>Odaa nigina oko ane yemaa me dibata odoejegi nimedi gadiwigotigitiwaji, nigini leeditibige makaamitawecetiawaji aotageni. <sup>45</sup>Igaataga codaa me Ee, Goneleegiwa ane jicogotibigimece ditibigimedi, ajanagi daga jiotage nigina oko, pida janagi me Ee niotagi, codaa me etidajigo me ideleo, odaa ja jao Aneotedogoji me yakadi me dibatetege eliodi oko.”

### **Jesus icilatidi ica golaga ane liboonagadi Bartimeu**

*(Mateus 20.29-34; Lucas 18.35-43)*

<sup>46</sup>Jesus ijaagijo nigijo anodiotibece jogoyakagiditeloco nigotaga Jericó. Nigijo naga doletibige me noditedice nagajo nigotaga, ijaagijo nigijo anodiotibece icaagica noiigi-nelegi, odaa jigicote ica goneleegiwa golaga ane liboonagadi Bartimeu, lionigi Timeu. Bartimeu idiaa nicote liniogotibece naigi, dipokotibige dinyeelo. <sup>47</sup>Nigijo naga wajipatibece modi Jesus anelatedigi nigotaga Nazaré me inaagigotedinece aneitice, odaa jigidaa dinanatigi me dapaawe, mee, “Jesus, anida anenitege licogegi inionigi Davi, adiwikodenita!”

<sup>48</sup>Pida eliodi oko oyapetege, codaa moiige me notokotini. Pida jegepaanaga dapaawetibece, mee, “Akaami, anida anenitege licogegi inionigi Davi, adiwikodeni!”

<sup>49</sup>Odaa Jesus ja dabiditedi, odaa ja diigenatakate monadeegitalo. Odaa jogonidita nigijo golaga, modita, “Eloodagateeni gadaalegena! Adabititini! Jegeniditedagawa.” <sup>50</sup>Odaa Bartimeu ja yokoletice aca nicaapa, codaa yediiga me dabiditini, odaa jigigo midoataga Jesus. <sup>51</sup>Odaa Jesus ja ige, meeteta, “Amiini ica anemaani me jaotagadomi?” Odaa nigijo golaga ja ninigodi, meetalo, “Iniotagodi, jemaa me jatetacibece.” <sup>52</sup>Odaa Jesus meeteta, “Emii, ja



gadicili leegodi manakatoni Aneotedogoji me yakadi me gadicilatiti.” Ajaagajo nagaca lakata Bartimeu jona yatetacibece, odaa ja diotece Jesus mijotaga naigi.

**Jesus dakatediwece nigotaga Jerusalém me liciagi nigina inionigi-eliodi**  
(*Mateus 21.1-11; Lucas 19.28-40; João 12.12-19*)

**11** <sup>1</sup>Jesus ijaagijo nigijo anodiotibece nogodipegita nigotaga Jerusalém, odaa jogototicogi minitaga ica lojotagadi ane liboonagadi “Lojotagadi Oliveira”, anipegitege icoa nigotadawaanaga ane liboonagadi Betfagé aniaa Betânia. Odaa Jesus ja iige itoa nigijo anodiotibece, odaa meetediogi, <sup>2</sup>“Emiitiwaji manitaga nigotakawaana digoida gododoe. Nige akaatiobecetiwaji, agica daga leegi icoota boliicawaanigi ane dinigoetini analeedigica mowaxoditeloco. Odaa owilecenitiwaji, anadeegitiwa. <sup>3</sup>Pida nigica aneetagawatiwaji, ‘Igame leegodi mowilecenitiwaji ini boliicawaanigi?’, odaa enita, ‘Goniotagodi yopotedibige. Nopilagadi natigidawaanigi.’”

<sup>4</sup>Odaa nigijo itoatataale anodiotibece jigigotibeci, odaa jogotota nigijo boliicawaanigi naigitece, dinigoetini ipegitege lapoagi ica diimigi. Odaa jogoyowilece nigijo boliicawaanigi. <sup>5</sup>Odaa ica oko anidiaagitice ja nigikanaga, moditiogi, “Igaamenitiwaji? Igame leegodi mowilecenitiwaji ini boliicawaanigi?”

<sup>6</sup>Odaa nigijo itoatataale anodiotibece Jesus jogoigidi nigijo aneetediodi Jesus me ligegi. Odaa nigijo oko jogoikatece nigijo anodiotibece Jesus moyadeegi boliicawaanigi. <sup>7</sup>Odaa nogoyadeegitalo Jesus nigijo boliicawaanigi, odaa jogoyexagateloco nicaapatedi nigijo boliicawaanigi, odaa Jesus ja waxoditedeloco. <sup>8</sup>Eliodi oko oipecetedice nicaapatedi nigijo naigitece, odaa ica eledi onakagidi exate-lamodi oipecetinece naigi. (Idagaee leegodi moiwenigide Jesus.) <sup>9</sup>Odaa ijo oko anigotibeci lodoe Jesus, codaa ica eledi bogodiatece lowidi napaawagateloco, modi, “Jiwenigidenaga Aneotedogoji!

Codaa jemaanaga Aneotedogoji me ibinie Niginoa anenagi ibake nagatetigi Liboonagadi Goniotagodi Aneotedogoji!

<sup>10</sup>Jemaanaga Aneotedogoji me ibinie Niginiwa anida aneetetege licogegi inionigi-eliodi Davi, ane niigetedogowa Aneotedogoji me goninionigi-eliodi, liciagi Davi me ninionigi-eliodi nigijo godaamipi!”

<sup>11</sup>Jesus ja dakatediwece nigotaga Jerusalém, odaa jigigo minitaga Aneotedogoji ligeladi. Naga dakatediwece, odaa iwitedigi initawece le. Nigidiaagidi ja noditedice leegodi naga gocidi, odaa jigigo manitaga nigotakawaana Betânia lixigagawepodi nigijo dooze anodiotibece.

**Jesus ixoo nagajo niale fiigoigo**  
(*Mateus 21.18-19*)

<sup>12</sup>Naga nigoi Jesus ja noditedicogi Betânia, odaa leecawaanigi ja deemitete me nigicile. <sup>13</sup>Odaa ditigedi naga nadite aca niale fiigoigo ane

daamotiide. Odaa jigigo iwi dagaca ela. Pida nigijo nigicote nagajo niale, agaca yakadi otaganitece ela, inokinoa laamotiidi, leegodi anaga limedi me etaye. <sup>14</sup>Odaa Jesus jegeete nagajo niale, “Nigina natigide, agaleegica ane yeligo gatá.” Odaa nigijo anodiotibece jogowajipatalo nigijoa lotaga.

**Jesus iticoitedicoace icoa anoonetekaga anidiaagi minitaga  
Aneotedogoji ligeladi**

*(Mateus 21.12-17; Lucas 19.45-48; João 2.13-22)*

<sup>15</sup>Odaa Jesus ijaagijo nigijo anodiotibece nogotota nigotaga Jerusalém, odaa ja dakatediwece minitaga Aneotedogoji ligeladi, odaa jigidaageyatedigi me iticoitedicoace ijoatawece nigijoa anoonetekaga codaa me nigijo ane oojeteega. Odaa yamagatedini nameejatedi nigijo ane libakedi moiikoage dinyelo codaa eledi yamagatedini nibaancotedi nigijo anoyaa yotipitedi. <sup>16</sup>Agica ane ika me ixomagatice minitaga Aneotedogoji ligeladi me yoyagadi elaanaga. <sup>17</sup>Odaa nigidiaagidi jigidiaagitedice me niigaxitediniwace ica oko, meetediogi, “Maditaga Aneotedogoji lotaganagaxi diniditeloço nigicoa Aneotedogoji lotaga, nigijo negee, ‘Oyatigi igeladi me “Diimigi aneitice inatawece noiigi moyakadi moyotaganenege Aneotedogoji”.’ Pida jagawiitiwaji Aneotedogoji ligeladi me liciagi nigina ligeladi olicagaga.”



*(Marcos 11.15-17)*

<sup>18</sup>Odaa nigijo anoiige sacerdotitedi ijaagijoa nigijoa niigaxinaganadi anodiigaxinagatece lajoinaganegeco Moisés jogodibodiceta nigijo Jesus aneote. Odaa jogodoletibige nigica nimawenegegi moyeloadi, pida odoitalo leegodi inatawece oko oyopo nigijo ane diigaxinagatece. <sup>19</sup>Naga gocidi Jesus ja noditacedice nigotaga Jerusalém.

**Jesus diigaxinagatece me leeditibige me jinakatonaga Aneotedogoji**  
(*Mateus 21.20-22*)

<sup>20</sup>Naga nigoi, Jesus ijaagijoa nigijo anodiotibece inaagigotacinece nigijo ligi, odaa jogonadi nagajo libatadi fiigo. Nagajo niale adatawece yadilo, codaa me litodi yadilo. <sup>21</sup>Odaa Pedro ja nalagatibige nigijoa Jesus lotaga, odaa meetalo, “Goniigaxinogodi, digawini! Nagajo niale ane ixoomi ja yadilo.”

<sup>22</sup>Odaa Jesus ja igidi, meeteta, “Anakatonitewaji Aneotedogoji! <sup>23</sup>Nigina nigewi me iwagatitewaji, akati me enita nagadi wetiga, ‘Emii, adinokolenitinigi akiidi-eliodi!’ Odaa nige daga awienatakanitewaji, pida nige iwagatakani micota nigijo ane gagegita, odaa Aneotedogoji eote micota. <sup>24</sup>Joanigidaa leegodi mejitagawatiwaji nigina motaganegeni Aneotedogoji, mkanicodaagica anipokitalo, iwagati Aneotedogoji me yajigotedagawatiwaji, odaa yajigotedagawa nigica ane ipokitalo. <sup>25</sup>Codaa nigina motaganegeni Aneotedogoji, ixomagateenitice okanicodaagica ane beyagi aneotagadomi eledi oko, amaleegaga Gadiodi ane ideite ditibigimedi ixomagateetedice gabeyacegectiwaji. <sup>26</sup>Pida nige daga ixomagateeniticitewaji nigina ane beyagi anowotagadomi eledi oko, odaa Gadiodi ane ideite ditibigimedi aixomagateetedice gabeyacegectiwaji.”

**Ica nagatetigi Jesus**  
(*Mateus 21.23-27; Lucas 20.1-8*)

<sup>27</sup>Nigidiaagidi Jesus ijaagijoa nigijo anodiotibece jigicotaciobece manitaga nigotaga Jerusalém. Jesus igotedigi Aneotedogoji ligeladi, odaa jogototalo nigijo anoiige sacerdotitedi, ijaagijoa nigijoa niigaxinaganadi anodiigaxinagatece lajoinaganegeco Moisés, ijaagijoa laxokodi lacilodi nigijo noiigi. <sup>28</sup>Odaa moditalo Jesus, “Amiida ica ganagatetigi miticoiticoace nigijo oko minitaga Aneotedogoji ligeladi? Codaa amiijo ane yajigotagawa ica ganagatetigi?”

<sup>29</sup>Odaa Jesus meetediogi, “Jelogoditagawatiwaji ane najigotiwa inagatetigi nigina nige adigiti ane gadigeetece. <sup>30</sup>Amiijo ica ane yajigota João Batista nagatetigi me nilegetiniwace oko? Domige Aneotedogoji, ogoa domigoko? Jemaa madigititewaji!”

<sup>31</sup>Odaa jogodinotigimadetigi, modi, “Nigejinaga me Aneotedogoji ane yajigote nagatetigi João, odaa jegeetedogowa, ‘Enice igame leegodi me daga iwagatitedatiwaji lotaga João?’ <sup>32</sup>Pida nigejinaga me nigina oko oiige João, odaa nigina oko jogoyelatogodomi.” Odoitiogi nigidi noiigi leegodi iditawece nigidi oko oyiwagadi João mewi me niginaagina nigina ane yelogoditedibece Aneotedogoji lowooko. <sup>33</sup>Odaa jogoigidi Jesus, moditalo,

“Ajowoogotaga ane niige João!” Odaa Jesus meetediogi, “Enice amagaga jatematitagawatiwaji ane najigotiwa inagatetigi me jaote niginoa yoenataka.”

**Ica natematigigi icoa nawodaganadi abeyacagaga**  
(Mateus 21.33-46; Lucas 20.9-19)

**12** <sup>1</sup>Jesus jigidaageyatedigi me yatematitediogi natematiko anida ane iciaceketetege me diigaxinaga. Odaa meetediogi, “Ica goneleegiwa eyatedi uuva libatatiidi, odaa ja niotaa, codaa eo ligixitaganagaxi me niopaagaditedi uuva me yoe viinyo, codaa eo lipe lajo moibeo nigijoa lawodigijedi niginoa nowienogododi. Odaa nigidiaagidi ja niwaihawepodi icoa nawodaganadi, odaa jigigo diniwajeticogi icaeledi iigo. <sup>2</sup>Nigijoa nigicota limedi me nopilagaditedio elali, nigijoa ane nebi nigijoa nawodigijedi nimonya ica liotagi me dienagatalo nigijoa elali ane nepilidi. <sup>3</sup>Pida nigijoa nawodaganadi odibata nigijoa nimeedi, odaa onalaketibige, codaa oiige mopi me digicata ane yadeegi. <sup>4</sup>Odaa nigijoa ane nebi ja niigetace icaeledi liotagi, pida nigijoa nawodaganadi onigidatice, codaa oyacilotidi lacilo, codaa owo me niboliga. <sup>5</sup>Odaa nigijoa ane nebi nigijoa nawodigijedi ja niigetace icaeledi liotagi, pida nigijoa nawodaganadi baanogoyeloadi. Odaa onalee niige icoa eletidi liimetedi, pida nigijoa nawodaganadi owo liciagi nigijoa eletidi liimetedi. Icaeledi dinalaketibigiwaji, icaagicaeledi bogonigodi. <sup>6</sup>Nigijoa ane nebi nigijoa nawodigijedi ini ica lionigi aneliodi me yemaa. Odaa



(Marcos 12.1)

nigidiaagidi ja iigeticogi nigijo lionigi midiwataga lawodigijedi. Meetibige le, ‘Odeemitetibige leegodi me ionigi.’ <sup>7</sup>Pida nigijoa nawodaganadi nogonaditege nigijo lionigi, odaa dinotaganege, modi, ‘Nigina nigijo lionigi nigijo ane nepilidi nigidiwa nawodigijedi, anicota me nepilidi niginoa lawodigijedi. Jeloataga, odaa ja jakataga me gonepilidi nigidiwa nawodigijedi!’ <sup>8</sup>Odaa jogodibata nigijo lionigi nigijo ane nebi nawodigijedi, odaa jogoyeloadi, codaa oyaladiticogi lolaadi wetice nigijoa nawodigijedi.”

<sup>9</sup>Odaa Jesus jegeetediogi, “Amiida ica anakatitiwaji meo nigijo ane nepilidi nawodigijedi? Enagi, odaa ja diigenatakatiogi monigodi nigijoa nawodaganadi, codaa yajigotiogi eletidi nawodaganadi nigidiwa lawodigijedi. <sup>10</sup>Ajawienatakanaga me naga alomegenitelocotiwaji lotaganagaxi Aneotedogoji, nigijo mee,

‘Nagajo wetiga anoyaladi nigijo anodabitegetini diimigi, nigina natigide jaganiaagani nagaca wetiga ane dagaxa mida jaoga catedi nigijoa eletidi wetiadi anoibake modabitegetini diimigi.

<sup>11</sup>Jigijaa Goniotagodi Aneotedogoji aneote nagajo wetiga me dagaxa mida ane jaoga.

Odaa jopooga nigida loenatagi.”

<sup>12</sup>Odaa nigijoa lacilodi judeutedi jogoyowoogodi nigijo Jesus naga yatemati nigijo natematigo me lakapetedipi. Odaa jogodoletibige moniwilo, pida odoitogi nigijo noiigi-nelegi. Odaa jogoika Jesus, odaa jogopitibeci.

### **Nigijoa fariseutedi oigetece Jesus migele moyediatece César icoa dinyeelo**

*(Mateus 22.15-22; Lucas 20.20-26)*

<sup>13</sup>Nigijoa lacilodi judeutedi oiigetalo Jesus icoa fariseutedi ijaagijo nigijo anodiotibeci inionigi-eliodi Herodes. Oiige migotibeci onake dogowo Jesus meote okanicodaagica ligegi ane beyagi domogowotibige me nilaagedi. <sup>14</sup>Igotibeci midoataga Jesus, odaa moditalo, “Niigaxinaganaga, jowoogotaga midioka limedi me enitece anewi, codaa agica mawii nigina oko minoa anodiletibige dagakaami. Igaataga agica mawii nagatetigi oko, pida ewi me iigaxinaganitece naigi Aneotedogoji. Domige lakapetegi gonajoinaganegegi me jedianagatece César dinyeelo, ninionigi-eliodi romaanotedi ane godiige me jedianaga? Domigele me jedianaga, ogoa agele?”

<sup>15</sup>Pida Jesus yowoogodi mokowo, odaa meetediogi, “Igame leegodi madineenitawiwaji? Digawii anadeegitiwa beexo.” <sup>16</sup>Odaa jogoyadeegitalo aca beexo, naga nigetediniwace, meetediogi, “Ame latobi aniwoteloce ani beexo, codaa ame liboonagadi ane diniditeloco?” Odaa modi, “César.” <sup>17</sup>Odaa Jesus meetediogi, “Enice ajicitatiwaji César ane nebi, codaa aagaga ajicitalo Aneotedogoji ane nebi.” Odaa jogoyopo nigijoa lotaga.

**Icoa saduceutedi oigetece Jesus anodaagee me newigatace nigina oko  
baanaga nigo**

*(Mateus 22.23-33; Lucas 20.27-40)*

<sup>18</sup>Nigidiaagidi jagaga onotalo Jesus icoa saduceutedi, nigijo anodi Aneotedogoji me degeote me newigatace nigina oko baanaga nigo. Odaa jogoige Jesus, moditalo, <sup>19</sup>“Niigaxinaganaga, Moisés didikotigi godoiigi nigida najoinaganenegegi, ‘Nigica goneleegiwa wadonaga ane yeleo me digicata lionigipi, odaa nioxoa nigijo ane yeleo leeditibige me lodawa nagani wajekalo micaa lionagatege. Odaa nigidi lionigipi micataga daga lionigipi nigijo ane yeleo.’ <sup>20</sup>Onica seete dinioxomigipi. Nigica liidaga naga wado, odaa ja yeleo me digica lionigi. <sup>21</sup>Odaa nigijo nioxoa liguejetewa ja lodawa nagajo wajekalo, pida nigidiaagidi jagaga yeleo me digicata lionigi. Odaa nigijoeledi nioxoa jagageo liciagi. <sup>22</sup>Odaa ijotawece nigijo seete dinioxomigipi nodawa ajokajo iwaalo, pida agica anini lionigitege. Naga nigo ijotawece, odaa nigidiaagidi jagaga yeleo nagajo wajekalo. <sup>23</sup>Ina nigeote Aneotedogoji niginoa émagaga me newigatace, amigepidigica nigijo seete dinioxomigi anepaga lodawa nagajo iwaalo, igaataga ijotawece nodawa nagajo iwaalo?”

<sup>24</sup>Jesus meetediogi, “Eliodi mabataatiwaji leegodi agowoogoti aneetece Aneotedogoji lotaganagaxi, otegeaxagaga owoogoti Aneotedogoji nimawenegegi. <sup>25</sup>Igaataga nigicota Aneotedogoji meote me newigatace niginoa émagaga, nigina oko agalee nadonagatelo, pida ja liciaco aanjotedi me daga nadonaga, otegeaxagaga nigajeega. <sup>26</sup>Ejinigica malomegenitlocotiwaji aneetece Aneotedogoji lotaganagaxi nigijo negeetece anodaagee Aneotedogoji micota meote niginoa émagaga me newigatace. Nigijo Aneotedogoji me ideitedice catiwedi nagajo nialawaana ane ídi, odaa meeteta Moisés, ‘Idioka limedi me Ee Noenogodi Abraão, Noenogodi Isaque, codaa me Noenogodi Jacó.’ <sup>27</sup>Odaa nigidiwa goneleegiwadi dice newiga, igaataga Aneotedogoji Noenogodi nigina oko ane newiga, idigida aNoenogodi émagaga. Odaa eliodi makamaga adininaalenitiwaji.”

**Jesus yalagate nigica niigenatakanenegegi ane dagaxa mida ane jaoga**

*(Mateus 22.34-40; Lucas 10.25-28)*

<sup>28</sup>Onica anigepidigica nigijoa niigaxinaganadi anodiigaxinagatece lajoinaganenegeco Moisés wajipatiogi nigijoa saduceutedi modinotigimadetiigi nigijoa lotaga Jesus. Codaa yowoogodi Jesus mele me igiditediogi. Odaa jigigo midoataga Jesus me ige, meetalo, “Amiida ica Aneotedogoji liigenatakanenegegi ane dagaxa mida ane jaoga?”

<sup>29</sup>Odaa Jesus ja igidi, meeteta, “Aneotedogoji liigenitakanenegeco ane dagaxa mida ane jaogate, nigijo niigenitakanenegegi anee, ‘Ajipaatiwaji, akaami anakaami loiigi Israel! Oniniwatece Goniotagodi Aneotedogoji, codaa Iniokiniwateda me Niotagodi inoatawece aninoa. <sup>30</sup>Lajo memaani Ganiotagodi

Aneotedogoji manitawece gadaalegena, codaa minitawece gadiwigo, codaa minitawece gadowoogo, codaa minitawece gadoniciwaga!’ <sup>31</sup>Codaa ida eledi niigenatakanegegi ane dagaxa mida ane jaoga, nigijo anee, ‘Lajo memaani eledi oko digo aneni makamaga adinemaani!’ Nigidoa itoataale niigenatakanegeco dagaxa mida ane jaogate caticedi ijoatawece nigijoa eletidi niigenatakanegeco.”

<sup>32</sup>Odaa nigijo niigaxinaganaga meetalo Jesus, “Niigaxinaganaga, ele motagani! Me enitece anewi nigijo negeni me oniniwatece Goniotagodi Aneotedogoji, odaa agicoa eledi aneotedogoji. <sup>33</sup>Codaa dagaxa mele me jemaanaga manitawece godaalegena, minitawece ica godowoogo, codaa minitawece godiwigo, codaa minitawece godoniciwaga. Odaa dagaxa mele me jemaanaga nigina eledi oko anodaagejinaga me idinemaanaga, aliciagi nigina me jalecaga ejedi maditaga nameeja Aneotedogoji me idinilakidenagatege leegodi gobeyacegeco, codaa nigina me jiboonagatalo eletidi goboonaaga.”

<sup>34</sup>Jesus nadi nigijo niigaxinaganaga ane diigaxinagatece lajoinaganegeco Moisés mida lixakedi nigijo me igidi. Odaa Jesus meeteta, “Ja domaga gadigomi Aneotedogoji me iige gadaalegena.” Nigidiaagidi naga nigotedini Jesus me dotaga, odaa agaleegica anabo laalegena me iige me dineetalo.

**Jesus digikatetece Nigicoa ane nimonyatedogowa Aneotedogoji**  
(*Mateus 22.41-46; Lucas 20.41-44*)

<sup>35</sup>Nigijo Jesus me diigaxinaga minitaga Aneotedogoji ligeladi, odaa ja nigetediniwace nigijo oko, meetediogi, “Nigijoa niigaxinaganadi anodiigaxinagatece lajoinaganegeco Moisés, igame leegodi moyakadi modi Nigicoa Aneotedogoji ane niige mokexaa ida aneetege licogegi Davi? <sup>36</sup>Igaataga Liwigo Aneotedogoji eo Davi me dotaga nigijo negee, ‘Inoenogodi Aneotedogoji meeteta Iniotagodi,

“Anicootini iwai ibaagadi nigepaa ikeke inatawece ganelogododipi?”’

<sup>37</sup>Ijaagijo Davi meetalo, ‘Iniotagodi’. Enige igamigodaagee Nigicoa Aneotedogoji ane nimonya me yakadi mokexaa ida aneetege licogegi Davi?” Nigijo noiigi-nelegi eliodi moyemaa nigijoa lotaga Jesus.

**Jesus yalagate nigijoa niigaxinaganadi anodiigaxinagatece lajoinaganegeco Moisés**  
(*Mateus 23.1-36; Lucas 11.45-53; 20.45-47*)

<sup>38</sup>Jesus niigaxitediniwace oko, odaa meetediogi, “Anidakitiogi nigijoa niigaxinaganadi anodiigaxinagatece lajoinaganegeco Moisés! Igaataga lemaanigi me ewaligitibigiwaji modinixotinigi toonicogo ocagataga ane lowoodagagi nigina oko gonegaga owotibige monicetibigiwaji codaa modeemitetibige miditaga licoogadi oko. <sup>39</sup>Lemaanigi monicotelogo nibaancotedi nigina oko gonegaga midiwataga niakanagaxiidi, codaa midiwataga nibaancotedi nigina oko anoiwenigide miditaga naloogo. <sup>40</sup>Codaa oibanootece ligelatedi codaa ane nepilidi niginoda wajekalodipi,

codaa onowo nigina mocagataga moyotaganege Aneotedogoji. Joanigidaa leegodi Aneotedogoji micota meliodi me iloikatiditedibigiwaji.”

**Aca wajekalo yajigotalo Aneotedogoji icoatawece nigicoa ninyeelo ane yopotibige**  
(*Lucas 21.1-4*)

<sup>41</sup>Jesus nicotedi minitaga Aneotedogoji ligeladi ipegitetege nagajo iwokodagaxi nelegi aneitice nigina oko moyokoletinigi ninyeelo anoibootalo Aneotedogoji. Iwi anodaagee nigijo oko moyajigo ninyeelo. Eliodi oko ane liicotedi oyajigo owidi dinyeelo. <sup>42</sup>Odaa nigidiaagidi jagagicotio aca wajekalo madewete, odaa ja yokoletinigi nagajo iwokodagaxi iniodataale beexotedi. <sup>43</sup>Odaa Jesus jegeniditediogi nigijo anodiotibece, odaa meetediogi, “Ejitagawatiwaji nagada wajekalo madewete yajigo caticedi nigina eledi oko anoyajigo. <sup>44</sup>Leegodi nigina eledi oko oyajigo ninyeelo ane dogoyopotibige, pida nagajo wajekalo бага yajigo ijoatawece ninyeelo, ane domaga yopotibige me dinoojetetibige ane yeligo.”

**Jesus yalagate moyojiketini Aneotedogoji ligeladi**  
(*Mateus 24.1-2; Lucas 21.5-6*)

**13** <sup>1</sup>Nigijo Jesus naga doletedibige me noditedice Aneotedogoji ligeladi, anigepidigica nigijo anodiotibece meetalo, “Goniigaxinogodi, digawini niginoa wetiadi nelecoli minitaga nigini diimigi! Codaa digawini nigica me libinienigi Aneotedogoji ligeladi!”  
<sup>2</sup>Odaa Jesus ja igidi, meeteta, “Naganati nigini diimigi-nelegi? Anigida noko otaganitece wetiga dipeteloco eledi minitaga nigini diimigi, onanikatedini idiwatawece.”

**Jesus yalagate micota minoa ane dakaketogodomi**  
(*Mateus 24.3-14; Lucas 21.8-19*)

<sup>3</sup>Jesus idiaagitedice minitaga nigijo lojotagadi ane liboonagadi “Lojotagadi Oliveira” nicotedi, dilokotetege Aneotedogoji ligeladi. Idiaagitedice oniniwatece, odaa jogototalo Pedro, Tiago, João ijaa André. Odaa jogoige, moditalo, <sup>4</sup>“Anatematitogowa nigica noko nigoyojiketini Aneotedogoji ligeladi. Codaa igamigodaagee Aneotedogoji me ikee nige nipegi moyanikatini?”

<sup>5</sup>Jesus jigidaageyatedigi me yelogoditediogi, odaa meetediogi, “Adinowetitiwaji adigica ane gadinaaleni! <sup>6</sup>Eliodi oko ane dinikeetibigiwaji, oibake Iboonagadi, odaa modi, ‘Ee Nigijo Aneotedogoji ane nimonya.’ Odaa eliodi oko anoninaaletiniwace. <sup>7</sup>Pida jinagadoiitiwaji nigajipaata layaco witidi, codaa nigabodictigi witidi, igaataga leeditibige mina ane diniwitidegetiwage. Pida anigicota nigica noko Aneotedogoji me yaagadi nigina iigo. <sup>8</sup>Igaataga nigina noiigi dinidelegetiwage, codaa niginoa inionaga oiige loiigi me witidi. Codaa icota me datalale iigo owidi nipodaga, codaa eliodi noiigi nigodi nigigi,



codaa mowidi goninyaco ane doide. Pida niginoa nawikodico jiginaagodojededi me nawikodico liciagi nigina odoejege lileenaganegegi nagana iwaalo ipilege.

<sup>9</sup>Pida adinowetitiwaji, igaataga etigadadeegiticogi lodoe nigijoa lacilodi, codaa etigadalakenitibigetiawaji midiwataga niiakanagaxiidi. Codaa leegodi maniwitici, odaa etigadadeegiticogi lodoe nigina aninoa nagatetico codaa midiwataga inionaga-eloodoli moiwi anodigotagawatiwaji. Odaa jigidaa nigakatitiwaji madatematiitiogi nigidiwa lacilodi. <sup>10</sup>Pida maleedaga yaagaditeda Aneotedogoji nigina iigo, leeditibigetiawaji matematiitiogi inatawece nigina noiigi nibodicetedi anele anoyalagatiwa. <sup>11</sup>Nige etigadiwilotiwaji, odaa jegetigadadeegiticogi lodoe niginoa lacilodi moiwi anodigotagawatiwaji, jinaga agowikomataatiwaji ane alitigi gagegi maleedaga etigadadeegitiwaji. Igaataga enitece nigica Aneotedogoji ane ikeetedagawatiwaji me alitigi gagegi. Igaataga niginoa gadotaga aicogoticogi makaamitagatiwaji, pida icogoticogi minitaga Liwigo Aneotedogoji. <sup>12</sup> Icota dinioxomigipi moyajigo epaa nioxoadipi monigodi, codaa nigina eniododipi oyajigo lionaga, codaa nionigipi dakapetege eliiododipi, odaa oibootiobece monigodi. <sup>13</sup> Eliodi oko oyelatagadomitiwaji leegodi maniwitici. Pida Aneotedogoji eote midioka limedi me yewiga miniwataga nigina oko ane ixomagateetedice lawikodico, codaa me degeyamagatice eliwagatakanegegi.

### Ica nawikodigi nelegi

*(Mateus 24.15-28; Lucas 21.20-24)*

<sup>14</sup> Icota manati nigica aneetece Daniel, nigijjo ane yelogoditedibece Aneotedogoji lowooko nigijjo jotigide, me yalagata nigica niwigo noenatagi aneo nigina oko ligecagalogo, libikotanaganagadi ane nigodi oko. Icota moidoyatice nigica niwigo digoida ane degele me itice. Nigina ane yalomegeteloco nigidiwa notaga ele me dinoniciwagadi me yowoogodi ane diitigilo. Nigonadi nigica niwigo, nigina oko ane ideitice nipodigi Judéia leeditibige me daleditibigimoace odeletibigimece wetiadi nelecoli. <sup>15</sup> Nigica oko ane idei ditibigimedi ligeladi lelága, ele me dagadakatio me dibatalo ane nepilidi. <sup>16</sup> Codaa nigica anidiaagitice nixogotagi ele me dogopitacio minitaga ligeladi me igota nicaapa. <sup>17</sup> Pida iwikodadipi iwaalepodi ipilagaga codaa eniododipi anelee oilipege lionaga! <sup>18</sup> Ele mipokitalo Aneotedogoji me daga ikateda meyoketege niwetaga nige limedi me ialeticoace. <sup>19</sup> Igaataga nigicoa nokododi owidi nawikodico. Nigijjo Aneotedogoji me iliidagadi nigina iigo codaa nigina natigide agica nawikodigi liciagi nigicoa nawikodico anenagi. Codaa agaleegicota eledi nawikodigi liciagi niginoa nawikodico anenagi. <sup>20</sup> Goniotagodi Aneotedogoji noxopanatidi nigicoa nokododi minoa nawikodico. Daaditaga noxopanatiditeda nigicoa nokododi, agotigica ane yakadi me yewiga. Pida noxopanatidi nigicoa nokododi leegodi nigina oko ane iolatedice idioka limedi me newiga miniwataga.

<sup>21</sup> Nigica aneetagawatiwaji, ‘Digawini! Nigijjo Aneotedogoji ane nimonya etidoa digoina!’ ogoa migetogodi, ‘Digawini! Etidoa digoida!’ Jinaga iwagatitiwaji. <sup>22</sup> Igaataga eliodi oko awitakagaga icota modi me nigidaagidoa

Nigijoa Aneotedogoji ane nimonya, ogoa domigodi me nigijaagijo nigijo anoyelogoditedibece Aneotedogoji lowooko. Odaa owote godoxicegetedi, codaa niginoa anetigodawelagadi moninaaletiniwace oko. Codaa domaga oninaaletiniwace nigina oko Aneotedogoji ane iolatedicoace me nepilidi. <sup>23</sup>Pida adinowetitiwaji! Ja jao gadeemidi maleedaga icotalo niginoa nawikodico anejitalo.

**Lanokegi Goneleegiwa ane icogotibigimece ditibigimedi**

*(Mateus 24.29-35; Lucas 21.25-33)*

<sup>24</sup>Nigidiaagidi, nige ixomagatedijo nigicoa nokododi menagi nigicoa nawikodico, odaa aligege ipe, codaa me epenai agalee datale. <sup>25</sup>Niginoa yotetitedi niwadetedi. Odaa Aneotedogoji itinege niwicidi anida nimawenegegi digoida ditibigimedi. <sup>26</sup>Odaa nigina oko etidadi Ee, Goneleegiwa ane jicogotibigimece ditibigimedi. Idinikatini jiniotinece lolaadi, odaa janagi meliodi inimawenegegi, codaa jikee mida inagatetigi liciagi Aneotedogoji nagatetigi. <sup>27</sup>Jiige iniaanjotedi migoteloco inatawece nigina iigo moniodatece nigina oko Aneotedogoji ane iolatedicoace me nepilidi.

<sup>28</sup>Digowoo nagana niale fiigoigo, odaa akati mowoogoti. Nige dione libiwedi, codaa laamotiidi naga nokologo, odaa jogowoogotitiwaji naga nipegi limedi ebicitedi. <sup>29</sup>Odaa jigidaagee nigeno nigicoa nawikodico, odaa jagakati mowoogotitiwaji naga nipegi nigica noko moyaagadi Aneotedogoji ligeladi. <sup>30</sup>Ejitagawatiwaji nigina anewi. Icotece inoatawece niginoa anejitedagawatiwaji maleedaga nigo eliodi oko ane newiga nigina noko. <sup>31</sup>Ditibigimedi inaa iigo icota me ma, pida yotaga baadaga ixomagatedice.

**Agica ane yowoogodi nigica noko Jesus nige dopitedijo**

*(Mateus 24.36-44)*

<sup>32</sup>Odaa agica ane yowoogodi nagaca lakata otegexaagaga nigica noko nige idopitijo. Otegexaagaga nigidiwa aanjotedi digoida ditibigimedi agoyowoogodi, otegexaagaga Ee, Lionigi Aneotedogoji ajowoogodi. Pida iniokiniwateda Aneotedogoji ane Eiodi, бага yowoogodi. <sup>33</sup>Adinowetitiwaji, codaa midioka limedi me gadigomi codaa otaganegeni Aneotedogoji igaataga agowoogotitiwaji nigeno nigica noko. <sup>34</sup>Nigida me Ee iciagi nigina goneleegiwa anigo diniwajeticogi eledi iigo. Odaa yajigota nagatetigi nigidiwa liimetedi, codaa yajigota oninitecibeci epaa libakedi. Odaa ja iige nigini nowienogodi diimigi midiaanaga igoadita me dinowedi. <sup>35</sup>Enice, adinowetitiwaji, igaataga agowoogoti nigica noko nige idopitijo, Ee, ane iciagi nigijo ane nebi diimigi. Yakadi me gocidi, domige liwigo-enoale, domige nigidatege nigoi, ogoa domige naga yelogotibige, nige idopitijo. <sup>36</sup>Enice adinowetitiwaji amaleegaga nige awelegegi me idopitijo, odaa agadakatitiwaji me iote, otegexaagaga me dagawii nigijo gabakedi ane joyatagadomitiwaji mawii. <sup>37</sup>Nigida anejitagawatiwaji, ejitioigi iditawece iotagipi, magaga dinoweditibigiwaji!”

**Nigijoa lacilodi judeutedi odoletibige nimawenegegi moyeloadi Jesus**

*(Mateus 26.1-5; Lucas 22.1-2; João 11.45-53)*

**14** <sup>1</sup>Aniaditibige itoataale nokododi daga nakatio nalokegi anodita me Páscoa, codaa nigijo eledi nalokegi anodita “Lalokegi paon ane digica labookojegi”. Nigijo anoiige sacerdotitedi ijaagijoa nigijoa niigaxinaganadi anodiigaxinagatece lajoinaganegeco Moisés odoletibige nigica nimawenegegi modolicetalo Jesus moyeloadi. <sup>2</sup>Pida modi, “Agele me jibagatalo mido naloogo ade jaogatibige nigidi noiigi metigodidelege.”

**Aca iwaalo yadotigi Jesus lacilo nadokojegi**

*(Mateus 26.6-13; João 12.1-8)*

<sup>3</sup>Nigijo Jesus midiaagitedice manitaga nigotakawaana Betânia, minitaga ligeladi Simão nigijo anijo me dawace-lolaadi. Naganiodi, jigigo aca iwaalo miniwataga yadeegi aca bootawaana wetiga ane liboonagadi “alabastro”. Nagajo bootawaana nolee nadokojegi ane liboonagadi “nardo”. Nigijo nadokojegi agica gaantigini lalegedi, codaa dakake loojedi. Nagajo iwaalo noyaagadi nagajo bootawaana, odao ja yadoteloco Jesus lacilo nigijo nadokojegi. <sup>4</sup>Ica oko anidiaagitice anonadi oyelatema, odao dinotaganege, modi, “Igame leegodi me yame ida nadokojegi? <sup>5</sup>Agoniaageyaa nigida nadokojegi loojedi caticedi miniwatadagani taalía beexotedi (abotege loojedi onidateci nicaagabi me jibaaga), oditaga yajigotigi niginoa madewetedi nigidiwa dinyeelo owidi.” Odao jogoyapetege nagajo iwaalo.

<sup>6</sup>Pida Jesus meetediogi, “Ikanitiwaji nagani iwaalo! Igame leegodi manapetegenitice? Eotomi nigica nibakedi libinienigi. <sup>7</sup>Igaataga niginoa madewetedi idioka limedi mina makaamitagatiwaji, odao akati me axawanitigi nigemaani. Pida Ee baadigidioka limedi minaagejotice makaamitagatiwaji. <sup>8</sup>Nagani iwaalo eo nigica ane yakadi meo. Enagi maleedaga ideleo nyenyagadi yolaadi monaligitini. <sup>9</sup>Ejitagawatiwaji nigina anewi. Nigina moyatematitedibece niginoa nibodicetedi anele aneetici inatawece iigo, oyatematitibece nigida aneotomi moyalagatibige nagani iwaalo.”

**Judas dinilakidetege nigijoa lacilodi judeutedi me yajigo Jesus**

*(Mateus 26.14-16; Lucas 22.3-6)*

<sup>10</sup>Judas Iscariotes nigijo anida aneetege nigijo dooze anodiotibece Jesus igo yotaganege nigijo anoiige sacerdotitedi me dinilakidetege me yajigo Jesus. <sup>11</sup>Odao eliodi me ninitibigiwaji nogowajipa ane ligegi, odao jogodinilakidetege moyedia. Odao Judas jigidaa dinanatigi me doletibige nigica nimawenegegi me yajigo Jesus.

### Jesus ijaagijo anodiotibece oyeligo liweenigi nalokegi Páscoa

(Mateus 26.17-25; Lucas 22.7-14, 21-23; João 13.21-30)

<sup>12</sup>Nigijjo odoejeji noko nalokegi ane liboonagadi “Paon ane digica labookojegi”, nigijjoa judeutedi onigodi waxacocoli me odinenyagaditege moyoe liweenigi nige nakatio nalokegi Páscoa. Nigijjo noko nigijjo anodiotibece oige Jesus, moditalo, “Igamemaani meitice me joenaga goweenigi lajo Páscoa?”

<sup>13</sup>Odaa Jesus ja iige itoataale nigijjo anodiotibece, meetediogi, “Emiitiwaji nigotaga, odaa akapetege goneleegiwa ane yoyagadi leo ane nolee ninyogodi. Odaa iwitecetiwaji lowidi nigijjo goneleegiwa. <sup>14</sup>Nige dakatiwece diimigi, enitatiwaji nigini ane nebi diimigi, ‘Goniigaxinogodi godiige me jigikanagatigi ane digetigi ica godicoogadi ane itice me jelicaga liweenigi nalokegi Páscoa me ligi iwepodi anodiotibece.’ <sup>15</sup>Odaa ikeetagawa godicoogadi nelegi ditibigimedi dalagate diimigi. Nigini godicoogadi jaigo, codaa idiwa inoatawece ane jopoogatibige. Odaa oenitiwaji goweenigi lajo nalokegi Páscoa.”

<sup>16</sup>Odaa nigijjo itoataale anodiotibece jigigotibeci, odaa jogoyakadi ijoatawece nigijjoa aneetediogi Jesus. Odaa jogoyoe ica liweenigi Páscoa.

<sup>17</sup>Nigijjo naga dawike, Jesus jigicotedio minitaga nigijjo diimigi lixigagawepodi nigijjo anodiotibece. <sup>18</sup>Odaa egidaagee me niodaga maditaga nameeja, Jesus meetediogi, “Ejitagawatiwaji nigina anewi, ini nigina akaamitiwaji anadigiwani, idajigotigi inelogododipi.” <sup>19</sup>Odaa jigidaa diiticogi magecagalodipi, codaa oninitcebici ige Jesus, meetalo, “Domige ee gadajici? Ejidaga jakadi daga gadajici!” <sup>20</sup>Odaa Jesus meetediogi, “Nigini ane ititinigi nipaon liwagedi midataga godokoladi nigina akaamitiwaji anakaami igi iwepodi, jiginiaa idajigo. <sup>21</sup>Lotaganagaxi Aneotedogoji yalagatiwa, Ee, Goneleegiwa ane jicogotibigimece ditibigimedi, me leeditibige me ideleo. Pida nagoodi nigini goneleegiwa ane idajigotigi inelogododipi, Ee, Goneleegiwa ane jicogotibigimece ditibigimedi. Ejimetaga dagaxa meletema nigini goneleegiwa daaditigicata menitini! (Igaataga Aneotedogoji eliodi me iloikatidi nigini goneleegiwa.)”

### Ica owidijegi liweenigi Goniotagodi

(Mateus 26.26-30; Lucas 22.15-20; 1 Coríntios 11.23-25)

<sup>22</sup>Nigijjo maleegidaagee me niodaga, Jesus dibate ijo paon, odaa diniotagodete Aneotedogoji leegodi nigijjo paon. Naga ninoketedini nigijjo paon, odaa ja yajigotediogi nigijjo anodiotibece. Odaa meetediogi, “Nee, abaategetiwaji! Nigidi paon jiciaceketege yolaadi.” <sup>23</sup>Nigidiaagidi odaa jagaga dibate aca goopa ane nolee viiyo. Naga diniotagodete Aneotedogoji, odaa ja yajigotediogi nagajo goopa ane nolee viiyo, odaa ijotawece owacipeta nigijjo viiyo. <sup>24</sup>Odaa Jesus meetediogi, “Nigida viiyo jiciaceketege yawodi ane inadoogodi leegodi eliodi oko. Odaa Aneotedogoji jigida gela nimawenegegi me dinilakidetetege nigina oko leegodi me inadoogodi yawodi. <sup>25</sup>Ejitagawatiwaji nigina anewi. Agalee jacipe nigida viiyo nigepaagicota me iige Aneotedogoji laalegenali nigina oko,

odaa micataga daga jacipeta gela latopagi viinyo.”<sup>26</sup> Naga nigotiniwace me nigaanaganaga, moigaa onatecigijoa Elaco Davi, odaa ja noditicoaci, jigigotibeci minitaga lojotagadi ane liboonagadi “Lojotagadi Oliveira”.

**Jesus eote leemidi Pedro iditawece nigijo anodiotibece icota me ilaagitibece**  
(*Mateus 26.31-35; Lucas 22.31-34; João 13.36-38*)

<sup>27</sup> Jesus meetediogi nigijo anodiotibece, “Inaagina nigina enoale, akaamitawecetiawaji adikani, igaataga diniditeloce maditaga lotaganagaxi Aneotedogoji ane yalagate Aneotedogoji, nigijo mee,

‘Jeloadi nigini nowienogodi waxacocoli,  
odaa nigidiwa waxacocoli ilaagitiawaji.’

<sup>28</sup> Pida nigidiaagidi nige idewigatace, ejigo gadodoetiawaji miditaga nipodigi Galiléia.”

<sup>29</sup> Pida Pedro meetalo, “Icaagica nige inatawece etigadikani, pida ee baadaga gadikani!”

<sup>30</sup> Odaa Jesus meeteta, “Ejitagawa nigina anewi. Inaagina nigina enoale, anigicatibige daga itoataale manoe okogokoodi, odaa itoatadigida meni me dagadowoogoti.”

<sup>31</sup> Pida Pedro dinoniciwagaditibece me igidi, mee, “Ica degeji me daga gadowoogoti, icaagica nige leeditibige makaami yemagawa, ja idigo makaami yemagawa!” Odaa ijotawece nigijo eledi anodiotibece idaagoyatigi ligegi.

**Jesus yotaganenge Aneotedogoji midiwataga nawodigijedi nialeli**  
**“oliveira” ane liboonagadi Getsêmani**  
(*Mateus 26.36-46; Lucas 22.39-46*)

<sup>32</sup> Jesus ijaagijo nigijo anodiotibece igotibeci midiwataga nawodigijedi nialeli “oliveira” ane liboonagadi Getsêmani. Nigidiaagidi meetediogi, “Inaagoni anicootiniwacetiawaji, ejigo jotaganenge Aneotedogoji.”<sup>33</sup> Baga yadeegi lixigagawepodi Pedro, Tiago ijaa João. Odaa jigidaa diiticogi meliodi magecagalo, doitedibece, codaa me dogowikomata. <sup>34</sup> Odaa meetediogi, “Catiwedi yaalegena eliodi me Ee agecagalo, ane jeemitetece liciagi nigina daantaga doletibige me ideleo. Inaagonitetiwaji, codaa adinoweti.”

<sup>35</sup> Odaa jigigoawaanigi odoe, odaa ja yamagatedinigiigo lokotidi, odaa dipokote Aneotedogoji dokaaga yakadi me yatamagateetege nagaca lakata nigicoa lawikodico. <sup>36</sup> Odaa Jesus mee, “Eiodi yemaanigi, akati mawii okanicodaagica. Nigemaani adatamagateenitege nigicoa yawikodico ane leeditibige me jixomagateetedice! Pida jemaa me jao nigica anemaani, idigida aginokinoa niginoa ane emaga jemaa me jaote.”

<sup>37</sup> Nigijo naga dopitetege nigijo itoatadigida anodiotibece, odaa enotediogi me notagateloco, odaa meeteta Simão Pedro, “Simão, iote? Agakati madinoweti otegexaagaga onaniteci lakata?”<sup>38</sup> Adinowetitiawaji, codaa otaganegeni

Aneotedogoji me daga abataa nige dineetagawa Satanás. Igaataga begemaani mawitiwaji nigina Aneotedogoji ane yemaa, pida agica gadoniciwagatiwaji.”

<sup>39</sup>Jesus ja yetecetacedicoace nigijo itoatadigida anodiotibece, odaa jigigotace yotaganegé Aneotedogoji yopilagateetedeloco ijaagijoatace nigijoa ane lotagaté. <sup>40</sup>Naga dopitacedijo miditaga nigijo anodiotibece, odaa jegenotacediogi me niotaga. Leegodi eliodi me liotaga, codaa agoyakadi me noleticoace. Odaa agoyowoogodi nigica anoyatigi ligegi moyotaganegé Jesus.

<sup>41</sup>Nigidiaagidi Jesus jigigotace yotaganegé Aneotedogoji. Nigijo naga itoatadigida me dopitacediogi nigijo anodiotibece, odaa meetediogi, “Egiotetiwaji, egidaagee manipenitiniwace? Jagabotiwaji! Nagaca inilakata me jawikode ja nipeci micoteloco. Jegetidajigotiogi libaagadi nigijoa goneleegiwadi abeyacagaga, Ee, Goneleegiwa ane jicogotibigimece ditibigimedi. <sup>42</sup>Adabititiniwacetiwaji, jopilaga! Digawini! Etina jegenagi nigijo ane idajigotiogi inelogododipi.”

### Jesus diniwilo

*(Mateus 26.47-56; Lucas 22.47-53; João 18.3-11)*

<sup>43</sup>Egidaageeteda me dotaga Jesus, odaa jigicotalo Judas nigijo anida aneetege nigijo anodiotibece Jesus. Lixigagawepodi eliodi oko liigexedi nigijo anoiige sacerdotitidi ijaagijoa nigijoa niigaxinaganadi anodiigaxinagatece lajoinaganegeco Moisés, ija nigijo laxokodi lacilodi nigijo noiigi. Nigijo noiigi-nelegi onigoetigilo nodaajoli-ocagatedi inaa neboli. <sup>44</sup>Nigijo Judas ane yajigo Jesus maleedigicotalo, ja yelogodi ica anodaagigotalo me ikee Jesus. Odaa meetiogi, “Nigica goneleegiwa ane inapicogo jigidaagidoa nigijoa anoleetibigetiwaji. Odaa abaatalo, adeegitetiwaji maniwilo.”

<sup>45</sup>Odaa Judas jigigo dowicetelogo Jesus, odaa meetalo, “Iniigaxinogodi, iniigaxinogodi!”, odaa ja nopicogo Jesus. <sup>46</sup>Odaa jogodibatalo Jesus, jogoniwilo. <sup>47</sup>Pida ganigepidigica nigijo anidiaagi midoataga nixigitice lodaajo-ocagataga, odaa ja yakagiditice napaagate nigijo liotagi nigijo lacilo-sacerdotitidi. <sup>48</sup>Odaa Jesus meetediogi nigijo noiigi anodibatalo, “Managitiwaji adiwilo anadeegi gadodaajoli, ganeboli micataga daga Ee goneleegiwa agopeloagi. <sup>49</sup>Owidi nokododi idiaagejotice minitaga Aneotedogoji ligeladi, jiniigaxitiniwace noiigi, pida agadiwilotiawaji. Pida natigide jigicota aneeta lotaganagaxi Aneotedogoji.”

<sup>50</sup>Odaa ijotawece nigijo anodiotibece jogoika agaleegica mowote, ja daleditibige.

<sup>51</sup>Onini ica lioneege ane diotibece Jesus. Onadi me dinilipaditigi nigelate me yapogoditini lolaadi. Odaa jogodoletibige modibata domogoniwilo. <sup>52</sup>Pida yaladi nagajo nigelate, odaa jegelodi mokijotani.

### Oyadeegi Jesus lodoe nigijoa seteenta lacilodi nigijo noiigi

*(Mateus 26.57-68; Lucas 22.54-55, 63-71; João 18.13-14, 19-24)*

<sup>53</sup>Odaa jogoyadeegitedicogi Jesus minitaga diimigi-nelegi ligeladi nigijo lacilo-sacerdotitidi. Ja dinatecogotee nigijo anoiige sacerdotitidi,

codaa me nigijoa lacilodi noiigi judeu ijaagijoa nigijoa niigaxinaganadi anodiigaxinagatece lajoinaganegeco Moisés. <sup>54</sup>Pedro diotece Jesus pida leegitalo me yetecetedice, oada ja dakatiwece miditaga niogó nigijo diimigi-nelegi ane ligeladi nigijo lacilo-sacerdotitedi. Odaa ja nicotini liwigotigi nigijoa niotaka liniogotibece noledi magaga dinito. <sup>55</sup>Nigijo anoiige sacerdotitedi codaa mijotawece nigijoa seteenta lacilodi judeutedi odoletibige gaantigijo ane yakadi anigetigida ane leegodi modinanimagatalo Jesus domogowotibige dogodiigenatakatalo moyeloadi. Pida agica anoyakadi. <sup>56</sup>Eliodi oko owote liwitakeco moyalagatalo Jesus, pida nigicoa lotaga agica ane niwoditema.

<sup>57</sup>Odaa onijo ica oko ane dabiditiniwace, oada ja niwitakaga, modi, <sup>58</sup>“Jajipaagatalo me yalagate me yaagadi nigini Aneotedogoji ligeladi ane loenatagi goneleegiwadi, oada nige itoatadigida nokododi, oada jegeotace eledi diimigi ane daga loenatagi goneleegiwadi.” <sup>59</sup>Pida otegeaagaga nigijoa notaga ane domogowote modakapetege Jesus agoniwoditema.

<sup>60</sup>Odaa nigijo lacilo-sacerdotitedi ja dabiditi liwigotigi nigijo oko, oada ja ige Jesus, meetalo, “Agica gagegi? Amiinoa icoa lotaga idiwa goneleegiwadi modakapetagagi?”

<sup>61</sup>Pida Jesus agica gaantigini ligegi. Odaa nigijo lacilo-sacerdotitedi ja igetace Jesus, meetalo, “Domige nagakamaagakaami Nigicoa Aneotedogoji ane niige me godatamaagetege godaxakawadi, Lionigi Nigijoa ane jogeegatalo?”



(Marcos 14.60-62)

<sup>62</sup>Odaa Jesus ja igidi, meeteta, “Jegemegee. Codaa akaamitawecetiwaji icota madati me idicotini liwai libaagadi Aneotedogoji anida eliodi nimawenegegi. Codaa icota madatitiwaji, Ee, Goneleegiwa ane jicogotibigimece ditibigimedi, nige jiniotinece lolaadi jicogotibigimece ditibigimedi.”

<sup>63</sup>Odaa nigijo lacilo-sacerdotitedi ja yaagadi nigijoa lowoodi diletibige Jesus daga dotagatibige Aneotedogoji, mee, “Agalee jopoogatibige eledi oko ane nelogoditogowa ane libatiigi. <sup>64</sup>Jagajipaatalotiwaji nigijoa lotaga me dotagatibige Aneotedogoji. Amiida ica anakatitcetiwaji?” Odaa ijotawece ja nilaagedi Jesus codaa modi me leeditibige moyelodi. <sup>65</sup>Odaa jonigica nigijo oko jigidaagoyatedigi Jesus monawaletedice. Codaa onibattoo latobi Jesus monalaketedibige, odaa moditalo, “Iwela! Amiijo ica ane gadalakeni?” Odaa nigijoa nowienogododi eledi onalaketedibige maleedogoyadeegiteda.

### **Pedro mee me digicoateda me yowoogodi Jesus**

*(Mateus 26.69-75; Lucas 22.54-62; João 18.15-18, 25-27)*

<sup>66</sup>Nigijo Pedro maleegidiaagitice miditaga niogó nigijo ligeladi nigijo lacilo-sacerdotitedi, odaa jigicota aca awicije liota nigijo lacilo-sacerdotitedi. <sup>67</sup>Pedro idiaagitice liniogotibece noledi dinito. Nagajo awicije naga nadi Pedro, iwita, odaa mee, “A-aami eledi idiaago-oonitice mijoataga Jesus, nigijoa Nazareeno.”

<sup>68</sup>Pida Pedro me dotaga mee me digica me dinadeegitibigege Jesus, odaa mee, “Otegeaagaga jowoogotawaanigiteda nigicoa goneleegiwa anenitalo.” Odaa jigigo midataga lapoagi niogó nigijo diimigi. Odaa jaganoe okogokoodi. <sup>69</sup>Odaa aca eledi niota naga nadi Pedro nigijo aneitice. Odaa nagajo niota meetiogi nigica oko anodipegitege, “Nigida aaginaga eledi do-ootibece Jesus.” <sup>70</sup>Odaa Pedro meetace me daga diotibece Jesus.

Naga leecawaanigi, nigijo oko anodipegitege moditaca Pedro, “Ejimewi makaami nigijo ane-diotibece, igaataga yelogo micogiticogi nipodigi Galiléia, leegodi gadotaganagawa nigina oko ane icogoticogi digoida Galiléia.” <sup>71</sup>Pida Pedro jigidaa dinanatacigi me dotaga, mee, “Jemaa Aneotedogoji me idiloikatidi nige degejitece anewi! Igaataga ewi meji me daga jowoogoditeda nigicoa goneleegiwa ane gadalakitalotiwaji.”

<sup>72</sup>Odaa nigijo okogokoodi jaganoe. Odaa Pedro ja nalagatibige nigijoa ane lotagate Jesus, nigijo meeteta, “Maleedaga itoataale manoe okogokoodi, odaa itoatadigida meni me dagadowoogoti.” Nigijo Pedro naga yowo nigijoa Jesus lotagate, odaa eliodi magecagalo, codaa anoe.

### **Jesus oyadeegite lodoe Pilatos, ninionigi-eliodi romaanotedi ane iige iditawece nipodigi Judéia**

*(Mateus 27.1-2, 11-14; Lucas 23.1-5; João 18.28-38)*

**15** <sup>1</sup>Nigijo naga yelogotibige, odaa nigijo anoiige sacerdotitedi odinatecogoteetege nigijoa laxokodi lacilodi judeutedi ijaagijoa nigijoa niigaxinaganadi anodiigaxinagatece lajoinaganegeco Moisés.



Odinilakidetege nigijoa eletidi seteenta lacilodi noiigi judeu. Odaa jogoigoetedi Jesus, jogoyadeegi igotibeci moyajigotalo Pilatos, nigijjo ninionigi-eliodi romaanotedi ane iige nigidi nipodigi Judéia. <sup>2</sup>Odaa Pilatos ja ige Jesus, meetalo, “Nagakamagakaami ninionigi-eliodi judeutedi?” Odaa Jesus naga igidi, meeteta, “Analiiki nigida ane alitigi gagegi.” <sup>3</sup>Nigijjo anoiige sacerdotitedi eliodi modotagatibige Jesus me domogowotibige me odinanimagatalo lodoe Pilatos. <sup>4</sup>Odaa Pilatos ja igetace Jesus, meetalo, “Agica anigetigida gadopilagatigi? Digawini, eliodi modotagatibigajaji, odinanimagatagawa.” <sup>5</sup>Pida Jesus agica gaantokaagida ligegi, odaa Pilatos eliodi me yopo.

### Odiigenatakatalo moyeloadi Jesus

(*Mateus 27.15-26; Lucas 23.13-25; João 18.39-19.16*)

<sup>6</sup>Nigina me nakatio lalokegi Páscoa, Pilatos ligilegegi me ikatema nigidi noiigi judeu onidateci niwilogojegi, nigica anepaagodipokotibige nigidi noiigi. <sup>7</sup>Odaa onini ica niwilogojegi ane liboonagadi Barrabás. Barrabás icaagicoa lokaagetedi diniwilotibigiwaji leegodi me nidelegetiniwace romaanotedi ane niigenatakanaga, codaa daije. <sup>8</sup>Nigijjo noiigi-nelegi dinatécogotee, odaa jigidaagoyatigi modipokota Pilatos nigica ane ligilegegitibece meo. <sup>9</sup>Odaa Pilatos igidi, meetiogi, “Emaanitiwaji me jikatedagadomitiwaji ninionigi-eliodi gadoiigi judeutedi?” <sup>10</sup>Pilatos eote nigijjoa lotaga leegodi yowoogodi nigijjo anoiige sacerdotitedi moyajigo Jesus leegodi monocetema.

<sup>11</sup>Pida nigijjo anoiige sacerdotitedi idioka limedi moyoniciwagadi nigica noiigi modipokota Pilatos me daga ikatedice Jesus, pida odipokota mijapaga ikatice Barrabás. <sup>12</sup>Pilatos ja nigetaciniwace, meetiogi, “Enice, amiida anemaani mejigotalo nigidoa goneleegiwa ane alitedigitiwaji me ‘Ninionigi-eliodi judeutedi?’”

<sup>13</sup>Odaa nigijjo noiigi napaawagateloco, modi, “Otonitedeloco nicenaganagate meloati!” <sup>14</sup>Odaa Pilatos ja nigetaciniwace, meetiogi, “Pida amiida ica loenatagi ane beyagi?” Odaa jegepaanaga napaawagateloco, modi, “Otonitedeloco nicenaganagate meloati!”

<sup>15</sup>Pilatos yemaa me yocaganenege nigidi noiigi. Odaa joanigidaa leegodi me ikatema Barrabás, odaa ja diigenatakatalo monalaketedibige Jesus, yajigo midiwataga iodagawadi moyototedeloco nicenaganagate moyeloadi.

### Nigijjoa iodagawadi oyametibigo Jesus

(*Mateus 27.27-31; João 19.2-3*)

<sup>16</sup>Odaa nigijjoa iodagawadi jogoyadeegi Jesus catiwedi nigijjo diimigi-nelegi, ligeladi nigijjo lacilo romaanotedi, odaa ijoatawece nigijjoa iodagawadi dinatécogotee. <sup>17</sup>Odaa jognixomegetedinigi Jesus aca caapa lixagotogogo, liciagi nicaapa niginoa inionaga-eloodoli. Odaa jogowo lale odatika lalepigigo moyoe, odaa jognixotinece Jesus lacilo. <sup>18</sup>Odaa jigidaagoyatedigi moyame, modi, “Nigidoa ninionigi-eliodi judeutedi!” <sup>19</sup>Odaa onaxacogitice lacilo, oyatitalo laxacogonagadi, onawaletedice, codaa moyamagatedini

lokotidi lodoe, onowo moiwenigide. <sup>20</sup>Nigijo nogoika moyametibigo, odaa jogonoga nagajo nicaapa lixagotogogo, odaa jogonixomegetacedinigi nigijoa epaa lowoodi. Odaa jogoyadeegi moyototedeloco nicenaganagate moyeloadi.

**Oyototedeloco Jesus nicenaganagate moyeloadi**  
(*Mateus 27.32-44; Lucas 23.26-43; João 19.17-27*)

<sup>21</sup>Nigijo maleegidaa diiticogi migotibeci minitaga lojotagadi, odaa jogodakapetege ica goneleegiwa ane liboonagadi Simão anelatibige nigotaga Cirene. Simão eliodi Alexandre ijaa Rufo, icogoticogi nipodigi, igotibeci nigotaga Jerusalém. Odaa nigijoa iodagawadi jogoiedegetege Simão me yoyagadi nagajo licenaganagate Jesus. <sup>22</sup>Odaa jogoyadeegitedicogi Jesus minitaga lojotagadi ane liboonagadi Gólgota (ane diitigi “Aneitice godacilo libitaka”). <sup>23</sup>Odaa nigidiaagidi domogoyajigotalo Jesus me wacipete viinyo awatege ica mirra ane yaagaditice nigina ane jileenaga, pida awacipete. <sup>24</sup>Odaa nigidiaagidi jogoyototedi Jesus maditaga nagajo nicenaganagate. Odaa nogodinawalacetigi nigijoa Jesus lowoodi, oiwi nigica anepaga dinetetece me yakadi oniditecibeci lowoodagagi. <sup>25</sup>Onaca noove lakata me nigoitijo nigijo nogoyototedi Jesus madataga nicenaganagate. <sup>26</sup>Diniditeloce nigica ane leegodi moyeloadi Jesus, oiditeloce taaboa ditibigimedawaanigi lacilo, iwoteloco,

“NINIONIGI-ELIODI JUDEUTEDI.”

<sup>27</sup>Codaa nigijoa iodagawadi aagaga oyototedi itoata agopeloaga midoataga eletidi nicenaganagatedi. Onijoteci oidoyatice liwai libaagadi Jesus, odaa icaeledi agopeloagi oidoyaticeeledi liwai digetege nimagijegi. <sup>28</sup>Odaa jigidaagee micotece nigijo aneetece Aneotedogoji lotaganagaxi, nigijo negee, “Anodigotagawa owo liciagi nigijoa agopeloaga.”

<sup>29</sup>Nigijo oko anidiaagigotinece midoataga onalomegetedice. Codaa oyabale inoa lacilodi, modi, “Aidiiga! Geemeni me domaga ojikeni ligeladi Aneotedogoji, odaa domaga adabitegenitacini catiwedi itoatadigida nokododi. <sup>30</sup>Jagabo mawikodee, axotitice nagada gadicenaganagate!”

<sup>31</sup>Idaagee magaga oyalomege nigijo anoiige sacerdotitedi, jjaagijoa nigijoa niigaxinaganadi anodiigaxinagatece lajoinaganegeco Moisés. Odaa dinotaganegetiwage, modi, “Eote nigijoeledi oko me newigatace, pida ayakadi mepaa dinewikatidi.” <sup>32</sup>Odaa moditalo Jesus, “Akaami ane eni Aneotedogoji me gadimonyaa me godatamagateenitege godaxakawadi, akaami ane eni makaami ninionigi-eliodi godoiigi Israel, adaxotiti nigina natigide nagada gadicenaganagate bidige jakataga me jinataga, codaa me gadadiwagategegi!” Codaa me nigijoa itoataale agopeloaga anagagoyototiniwace midoataga nicenaganagatedi aagaga oyalomege Jesus.

### Lemegegi Jesus

(Mateus 27.45-56; Lucas 23.44-49; João 19.28-30)

<sup>33</sup>Nigijo naga yaxogo-noko, ja nexocaga inatawece iigo, odaa nexocaga negepaa iniwatadagani lakata me gocidi. <sup>34</sup>Nigijo naga iniwatadagani lakata me gocidi, odaa Jesus igedi me dapaawe, mee, “Eloí, Eloí, lemá sabactani?” (Nigidiwa lotaga amina anejinaga “Inoenogodi, Inoenogodi, igaamee me dagadiaagica mawitigiji?”)

<sup>35</sup>Anigepidigica nigijo oko anidiaagitice owajipatalo nigijoa lotaga Jesus, odaa modi, “Digajipaatalo! Dapaawetedi Elias!” <sup>36</sup>Odaa onijoteci nigijo anidiaagitice midoataga walokodi, odaa itiminatidi nigijo litikonaganagadi midataga nigijo viinyo ane daga dakake loojedi. Odaa ja dabitegetibigimece Jesus me domego me ilibitece. Odaa mee, “Alotacaliita! Jemaa me jiwina Elias nigenagi nogatedice madataga nagada nicenaganagate.”

<sup>37</sup>Odaa Jesus dinigetagateetace me dapaawe, odaa ja yeleo. <sup>38</sup>Onada minitaga Aneotedogoji ligeladi aca lipegetege ane noxoco nigijo diimigi-le ane ijokjoateda Aneotedogoji mida aneetetege. Nagajo lipegetege daawidigidicetigi liwigotigi ditibigimedi negepaa natinedi. <sup>39</sup>Idiaagitice lodoe licenaganagate Jesus ica jajeentegi. Nigijo naga nadi



(Marcos 15.38)

anodaageeteda Jesus me dapaawe codaa anodaageeteda me yeleo, odaa mee, “Nigidoa goneleegiwa dicewi me Lionigi Aneotedogoji.”

<sup>40</sup>Onagaga idiaagiticoaci ica iwaalepodi pida leegitiogi moigoaditalo. Liwigotigi nigijo iwaalepodi ani nagajo anodita Maria Madalena, Salomé, ajaa Maria ane eliodo José, ijaa Tiago ane nilooxoxegi. <sup>41</sup>Nigijo Jesus maleegidiaagitedice nipodigi Galiléia, nigidi iwaalepodi odiotibece oyaxawa. Onidiaagaga itice ica eliodieledi iwaalepodi ane lixigagawepodi maleekokigoteda Jesus manitaga nigotaga Jerusalém.

### Nogonaligitini lolaadi Jesus

(*Mateus 27.57-61; Lucas 23.50-56; João 19.38-42*)

<sup>42-43</sup>Nigijo noko maleedaga nakatio saabado, noko nogodinoweditege ica lalokegi Páscoa. Naga gocidi, jigicotio José anelatibige nigotaga Arimatéia minitaga Pilatos. José goneleegiwa anele, lokaagetedipi me nibaaga nigijoo seteenta lacilodi judeutedi. Ja walitege nigica noko Aneotedogoji nige iige laalegenali nigina oko. José abo laalegena migo dipokota Pilatos Jesus lolaadi. <sup>44</sup>Pilatos yopo nigijo naga dibodicetibige Jesus naga yeleo. Odaa jegenidita nigijo jajeentegi me ige domigewi naga leecawaanigi me yeleo Jesus. <sup>45</sup>Nigijo jajeentegi naga yelogodita mewi, odaa Pilatos ja ika José me yadeegi Jesus lolaadi. <sup>46</sup>José dinoojeteta aca lipegetege lapacogogo, odaa ja noga Jesus lolaadi madataga nicenaganagate, odaa ja ilipaditigi Jesus lolaadi nagajo lipegetege. Nigidiaagidi ja yadeegiticogi Jesus lolaadi midataga ica ane gela moigodi lawimagajegi-wetiga. Odaa José ja noxoco yatita aca wetiga nelegi me noxoco. <sup>47</sup>Idiaagiticoaci moiwi Maria Madalena ajaa Maria ane eliodoeledi José. Odaa onadi nigijo anoyatice lolaadi Jesus.

### Jesus naga yewigatace

(*Mateus 28.1-8; Lucas 24.1-12; João 20.1-10*)

**16** <sup>1</sup>Nigijo naga ixomagatijo saabado, odaa Maria Madalena, Salomé ajaa Maria ane eliodo Tiago jogodinoojetetalo nadokojetedi me domogoyatita Jesus lolaadi. <sup>2</sup>One nigoitijo nigijo odoejegi noko semaana, aligege ja doletibige me nodi, odaa jigigotibeci midataga lawimagajegi-wetiga anoyatice Jesus lolaadi. <sup>3</sup>Naigitece ja dinotaganegetiwage, modi, “Amigetigijo ane nogowatogodomi nagajo wetiga nelegi ane noxoco nigijo wetiga-lawimagajegi?” <sup>4</sup>Odaa jigidaagee me dinotaganege igaataga nagajo wetiga dagaxa me nelegi. Pida nigijo naga icotiobece, nogoiwita, odaa jogonadi nagajo wetiga nelegi jogonogaticogi midataga nigijo lawimagajegi-wetiga. <sup>5</sup>Nigijo nogodakatiwece nigijo lawimagajegi-wetiga, odaa jogonadi ica lioneege ane dinixotinigilo nowoodi ane yapacaga. Nicoti digeticogi liwai libaagadi nigijo anoyatice lolaadi Jesus. Nigijo nogonadi, odaa eliodi me nawelatibigiwaji. <sup>6</sup>Pida nigijo lioneege meetiogi, “Jinaga anawelatiwaji! Jowoogodi me domogoleetibige Jesus anelatibige nigotaga Nazaré. Owoogoti moyototedeloco

nicenaganagate, oada ja yeleo. Pida agaleegicoa digoina, ja yewigatace. Digawini anoyatice lolaadi. <sup>7</sup>Pida nigina natigide emiitiwaji, elogotitigi nigijo anodiotibece codaa me Pedro. Enitigi migo Jesus dinewadetedicogi digoida nipodigi Galiléia. Oada jigidiaagitice manatitewaji, nigijo ane ligegitedagawatiwaji.”

<sup>8</sup>Oada ja yediiga me noditicoaci midataga nigijo lawimagajegi-wetiga, oada ja daleditibige, nawigicagatelo, leegodi meliodi me doitiwigiwaji. Oada agica gaantiqijo anoyatematita.

### **Jesus dinikeeteta Maria Madalena**

*(Mateus 28.9-10; João 20.11-18)*

<sup>9</sup>Jesus yewigatace nigijo naga domiingo me nigoitijo. Odoeje me dinikeeteta Maria Madalena, nagajo anijo mijoa seete niwicidi abeyacagaga ane iticoitedice Jesus. <sup>10</sup>Oada Maria Madalena jigigo, yatematitigi nigijo lokaagetedi Jesus aneliodi magecagalodipi codaa noenagatelo. <sup>11</sup>Oada nigijo naga nibodicaga Jesus naga yewigatace, codaa Maria mee me nadi, agoyiwagadi.

### **Jesus jagaga dinikeetediogi icoa itoataale anodiotibece**

*(Lucas 24.13-35)*

<sup>12</sup>Nigidiaagidi Jesus dinikeetediogi nigijo itoataale anodiotibece maleegidaa diiticogi mewaligitibigiwaji miditaga ica nipodigi wetice nigotaga. Ica ane latopagi diniigi nigijo naga dinikeetediogi. <sup>13</sup>Nigijo naga dopitibece, oada jogoyatematitigi nigijoeledi anodiotibece modakapetege Jesus. Pida nigijoeledi agoyiwagadi nigijo latematigo.

### **Jesus dinikeetediogi nigijo oonze anodiotibece**

*(Mateus 28.16-20; Lucas 24.36-49; João 20.19-23; Atos 1.6-8)*

<sup>14</sup>Nigidiaagidi Jesus ja dinikeetediogi nigijo oonze anodiotibece nigijo me niodaga. Oada ja napetegetediniwace leegodi laalegenali dagaxa me dakake, codaa leegodi me dogoyiwagadi naga yewigatace nogoyatemati nigijo anonadi naga yewigatace. <sup>15</sup>Oada Jesus meetediogi, “Emiitecetiwaji inatawece ane noiigi nigina iigo, atematiitedibecetiwaji nibodicetedi anele aneetici. <sup>16</sup>Aneotedogoji eote gela lewiga nigina oko aneyiwagadi nibodicetedi anele, codaa leeditibige me dinilege. Pida nigina oko ane degeyiwigadi, Aneotedogoji бага laagedi codaa me iloikatidi. <sup>17</sup>Aneotedogoji ikee nigica nimawenegegi, codaa eotetema loxicegedi nigina oko anoyiwagadi. Codaa oibake Iboonagadi nigina moiticoitedice niwicidi abeyacagaga, codaa odotagatigilo eletidi iolatedi ane digica modotagatigi nigica jotigide. <sup>18</sup>Nigodibatalo laketedi ane diniweneene, ogoa domige owacipeta weneeno me dogoyowoogodi, agica ninyaaqi. Nigoipeketelogo libaagatedi niginoa eelotaginadi, oada ja nicilaga.”

**Jesus nogopitedibigimece ditibigimedi***(Lucas 24.50-53; Atos 1.9-11)*

<sup>19</sup>Nigijo Goniotagodi Jesus naga ika me notaganegetediniwace, odaa Aneotedogoji ja yadeegitedibigimece ditibigimedi, odaa ja nicotedi liwai libaagadi Aneotedogoji ikee mida nagatetigi. <sup>20</sup>Odaa nigijo anodiotibece jigigotibeci oyatematitedibece nibodicetedi inoatawece ane nipodaga. Odaa Goniotagodi yaxawatediogi, codaa meote godoxicegetedi me ikee niginoa latematiko anoyatematitibece mewi. Odaa jigidaagee. (Amém.)